

嶺

南

羣

雅

吾粵詩自曲江而下明季三家以上作者前後蛻螬  
相望。煒哉盛矣。竊校前人能事。近體爲最。次則五言。  
古。多溯源漢魏。六朝有醇無疵。若七言古風格高不  
過高岑王李。間或馳騁才華。則芟駕之馬。不暇顧銜。  
勒繁會之音。不盡諧鍾呂。求其毫髮無憾。徃徃難矣。  
國朝鉅手迭興。迨魚山蔣房二樵諸公崛起。研鍊諸體。  
各擅所長。獨七言古詩。專以李杜韓蘇爲之師。引氣  
必盛。徵事必實。運思必沉。矢音必洪。置陣必整。彬彬  
乎入大家堂奧。有起衰式靡之功。粵中詩教於斯稱  
極盛焉。夫人情狃於近習。不能遠肇。而是古非今者。

又或捨目前之寶而不以爲奇。予少從先君子始學爲詩。卽獲與數公遊處。旣聞其說而信好之。間又廣咨時彦。旁羅遺佚。其中歌投頌吹合雅。莫不允洽乎予衷。方軌乎前秀。爰彙數十家。擇其尤雅者。斷自魚山以下二十九人。爲初集。而先君子遺詩附焉。其現存者。自芷灣以下四十三人。爲二集。統名曰嶺南羣雅。詩小雅之材七十四。大雅之材三十一。言衆多也。司馬長卿曰。載雲罕。掩羣雅。言求之者勤也。予賦性謏陋。區區一目之羅。不能引而上之以紹乎古。猶欲推而廣之以不遺乎今。遠壤詞人。搜訪未遍。儻

肯惠示鴻篇仍復續事剗勵俾廣

承平雅奏而予亦幸免暖暖姝姝之誚也乎嘉慶癸酉  
八月番禺劉彬華

嶺南羣雅目錄

初集一

馮魚山敏昌

饒曼唐慶提

張莉房錦芳

初集二

劉松崖鶴鳴

郭炳堂德鉅

黃翼堂紹統

周星航仲焜

張玉洲錦麟

胡同謙亦常

李杏墅壇

謝虹亭聖軒

趙渭川希璜

李載園符清

劉未山統基

謝芸隱景卿

溫謙山汝能

呂石颿堅

張丹崖對堦

方千谷天根

田西疇上珍

梁璜溪殿珍

初集三

黎一樵簡

葉石亭鈞

黃虛舟丹書

葉花谿廷勳

仇竹嶼巨川

胡玉山輝

丁駿山最

方竹孫繩武

筆耒軒吟稿

附

二集一

宋芷灣湘

徐曉初旭會

謝澧浦蘭生

李繡子黼平

莫臞山元伯

陸春圃樹英

顏穀田時普

高西山士釗

鍾鳳石啟韶

張繡山炳文

崔鼎來弼

林月亭伯桐

葉秋嵐蘭成



林辛山家桂

二集二

張南山維屏

李東田士楨

譚康侯敬昭

趙平垣均

徐東簣震

孟華墀佐舜

林鐵篴龍

溫莊亭承恭

何琴心元

丁鏡人嵩

鄭萱坪灝若

黃香石培芳

二集三

李秋田光昭

彭春洲泰來

李菊水遐齡

顏湘帆崇衡

陳仲卿壘

姚匠門廷掄

殷耕野師尹

蔡季材廷榕

潘伯臨正亨

吳載南俶

黃蒼崖喬松

簡夢巖厥良

劉湘浦濟之

劉月鋤廣禮

劉季子廣智

孔熾庭繼光

徐又白青

嶺南羣雅

番禺劉彬華藻林輯

馮敏昌

字伯求一字魚山欽州人乾隆戊戌進士官編修改刑部主事卒祠鄉賢著有小羅浮草堂詩集

玉壺山房詩話魚山先生性篤孝友學務力行道德粹然爲人倫模範非特以詩傳者而詩筆雄深雅健實足籠罩一切巍然爲嶺南一大宗蓋其天資既超又沉酣古籍穿穴百家由昌黎蘇黃上覓李杜堂奧乃自具鑑治獨開生面其才富其氣盛其聲正以大其肯蒼以勁中年獨游五嶽足跡直抵長城凡夫名山大川雲煙變滅波濤起伏之狀盤礴霄次而注於筆端益渾渾浩浩包孕萬象諸體靡弗擅勝而七言古陽關陰關海涵地負嘆觀止矣粵詩自曲江後一振於南園再振於海雪亭獨漉先生泰諸公以迄於今其力追正始凌轡前詁以弁冕百餘年來風雅羣英者非先生其誰與歸

漫感九首 錄五

至化本無形天地不能居陰陽未判時誰與爲乘除天元而地黃已爲數所拘日月耀其華山川衍其餘糟粕一以厭終返鴻濛初吾身旣云眇命亦屬須臾神靈所旁通冲漠爲之樞心寄後萬年意極四海隅天地會有窮吾身終非虛誰謂天地廣其廣乃吾廬誰謂天地神其神獨在余

迢迢海上林綿綿亘千里重重結柯葉一一屬根柢根柢何盤鬱枝葉所以起當其未發生荒寒亦相理朝含海上霞莫吸海中水春風一披拂尋丈竟安止亭亭雲漢間鬱鬱深谷裏條多陰自繁寒根得而倚行行感聖人激厲何時已山木有其根吾身有其始

人生有兄弟如鳥有羽毛羽毛苟不豐雖飛何由高故園有奇樹娜娜紛相交上有雄鳳棲下爲雌鳳巢慶雲出其裏氤氲無

昏朝南鄰有一樹枝葉何弊凋風雨深秋時往往吟鴟鵂鬼物  
日以至斧斤安可逃撫我嘉樹林念彼枯枝條根抵將母同奚  
爲殊所遭致祥與致戾中心長怆怆

吾劍有神靈黯如秋水濕中夜一長嘯蕭蕭風雨泣我欲登蓬  
萊乘風張片席茫茫日已暮不知所終極長鯨起海中橫波恣  
吞吐滄溟景若移山川勢盡失黑妖慘淡來波濤爭詭譎此時  
吾劍光上燭海天赤雷電懸腕底雲氣生肘腋獨立何杳冥揮  
手信一擊醜類倏殄滅而不動神色遙遙青雲中笙鶴兩行立  
羣仙抗手迎功成觴玉液始知吾此劍可以靜荒澤

魚湖一勺水春與魚山青湖上有芙蓉山中多杜蘅高臥當其  
閒攬此太古情有酒娛高堂有書娛弟兄旣無離別苦亦復來  
良朋富貴雖可求無德媿其名奇計雖可喜終以傷其生世途

日以險吾心亦以平合此宇宙心忘彼物我形

崧臺

天水茫茫合牂牁千里來蒼然留遠影晚色下山隈縹緲城鐘  
出差幾玲峽開長風吹不極人立古崧臺

由拔蒼峯登望海石過洞平原歸家道中口占

拔蒼峯  
卽村頭

嶺

峯頭豁遠目四望迴無鄰溟海嘯邊地亂雲凝古春年隨學共  
去性與山相親頗喜見村落愁爲羈旅人

雲海渺無際故山新有樓腐儒何地着爲客一春愁癡處夢徒  
遠歸來心轉留盤輿小原上日暮冷如秋

與勺海翼堂同賦秋蟲得言字四首

錄一

秋意已如此蕭蕭誰與論寒霜警詩骨微雨靜人言影入花叢

薄聲從客夜繁砌邊與籬側何處不銷魂

旦起侍慈行園作

慈親夜不寐申旦起行園披衣亟隨從衣裳慮慈單霜明天宇  
清清風戒其寒興言掇秋葵焜黃嗟少殘園南有蕭艾衰颯不  
可觀行行霜畦中慈親復解顏數畦先手鋤苗蔓綠猶繁采擷  
入筠簋聊思勸朝餐徘徊掩籬門黃菊開瓦盆採之不挿髮攜  
歸使風乾明日以讀書益壽同南山北堂欣有萱南堦欣有蘭  
歡忻且無盡奚與時歲闌

從樟木林入西原聽十里松籟

落月澹將曉騎馬出平林行人尙未出山寒風滿襟石礪太峭  
絕窈窕不可臨十里見長原千松何森森天籟有時鳴蕭條清  
客心慌疑塵世中有此太古音又似去鄉久爲此還山吟迢然



長嘯聲縹渺蒼煙深靜極自成響此意誰復尋繫馬枯松根聊爲枕吾琴

葫蘆洞按新息侯遺壘

新息侯王世無羣戈船南下清妖氛據鞍矍鑠不言老指揮萬眾置江濱至今八桂及交趾稱爲神武天將軍銅柱已鎮山海曲銅鼓更作蚪鰐紋或爲舟楫奠江水或爲鐘鼎銘功勲功勲萬古不磨滅一草一石留清芬當年冒暑涉斯境蠻溪五月炎如焚攜囊轉戰一千里瘡痍遍體何辛勦壺頭一臥真可惜少游語已成空文葫蘆之洞君所徇行營戰所連山分依山負水足自固入生出死徒紛紛甯山蛇勢不足數陰陽離合聊復云東漢而今幾人代遺址羅列如高墳我行慨然按餘壘獨騎黃馬當斜曛是時春半碧草短空天寥廓無纖雲忽然暮氣發煙

雨靈旂慘淡昏愁雲鉦聲無人響空谷隨風時與金笳聞歸來  
寂坐倚孤劍小窓沉水留氤氲人生豈得不勞苦功名潦倒終  
憐君

通天巖

寂寂空山中有此十日暇主人念我愁導我斯巖下斯巖何穹  
窿其高與天亞我來得小徑攀躋出石罅循行緣迴溪遠見飛  
湍瀉懸溜拗左折中有虹梁跨巨石紛紜一相抵架洞口  
過一身如出惡少勝初疑雲氣暗少覺日光射拔地聳重樓凌  
空杳飛榭蚪蚪龍蛇生鍾乳人獸化千態恣騰跳小康獲慰藉  
宛轉連戶闔彎環準廡舍異石生其間晶瑩古無價巖中有石如晶玉  
紅蘭開小春綠蘚靜長夏巢空飛鼠潛磴懸宿羽借藤臂夜叉  
懸雲轡丹螭駕雷霆走白日鬼怪出陰夜蜿蜒寸蠟窮豁做中

魂訝鬼斧與神工。徃徃生嗟詫。如何古天地。亦有此機詐。磨崖  
晒溫公蠟屐。失諸謝坎坎。石徑危杳杳。山靈迓崦嵫。下落日追  
遊頓忘罷。

晚泊中宿峽

長河百折此中經。向晚孤帆且暫停。半角日沉微雨黑。一聲猿  
斷衆山青。人當客路常難別。酒到鄉心亦易醒。欲向飛來尋徃  
蹟。煙蘿深處冷冥冥。

曉入峽山尋歸猿洞得四律

錄一

空青與煙闌。片水圍苔痕。石氣不離雨。雲陰常在門。何人見清  
曉。獨徃聞孤猿。渺渺自惆悵。難爲塵世喧。

濛濛驛曉起二首

錄一

煙水渺沉沉。孤舟望遠心。一峯雲不落。千樹雨相深。岐路惟餘

感年愁獨苦吟誰知有閒客寥寂尙琪林

樟樹鎮王文成公誓師處

烽火連天贛水濱一時兒戲是君臣誰知尙有先生在始信詩  
書不腐人

將至金陵

向曉推篷處垂楊夾水迎微微遠煙色初見秣陵城佳麗六朝  
地栖遲孤客情會須尋李白一上酒樓行

貓兒河夜泊

黯黯寒燈照水隈蕭蕭蘆葦易生哀孤舟送雁三春去一劍將  
身萬里來宛轉河流通下相蒼茫雲氣接東萊壯遊空有當年  
志纔歷風塵半已灰

望岱宗

岱宗有神靈尊爲五嶽獨真氣所融結萬物敢不肅日月照其  
頂齊魯衛其足十八盤冥冥何人夜中宿

淮陰道中

聞笛泣然地重來已是秋秋風渡淮水落日下秦郵木葉飄蕭  
過蘭橈宛轉愁天涯渺何處顚顚向汀洲

西臺尋謝臯羽墓

西臺長慟後坏土亦荒榛竹石碎當日乾坤空此人臺前雲漠  
漠臺下水粼粼朱鳥歸何處蕭條一愴神

尊經閣觀所懸靈覺寺古鐘歌

洪爐烈火橫天紅神物化成飛入水波濤沆瀣不見人曠古精  
靈在於是大網沉沉煙際開鯨魚泣血龍盪迴巨網初舉見奇  
狀萬人屏息顏如灰蠻夷大帥心翻悅心爲摩挲手爲掠以昭

來世更留銘銘以其王之歲月何人探囊出寶刀  
剗剔上下如吹毛想像當年十指上定有鬼母隨  
而號銘成見者皆驚顧布施金珠已無數得入  
昭光大有絲轉歸靈覺夫何故蠻王昔造靈覺時  
數載功勞能獨支十丈虹梁飛玳瑁萬重碧瓦  
堆琉璃於時此鐘負靈質懸向飛樓幾人擊向日  
朝隨法鼓鳴橫波暮使銅船出流光荏苒政和  
年昌符回首猶目前試聽鯨音晚來發如有歸情  
當海天城北老龍殊太惡夜起腥氛滿城郭既  
警當年浩蕩心遂動此時戰爭樂滿城風雨何冥  
冥鬼哭神號難可聽波間巨怪氣方靜床上老僧  
心轉靈平明起集緇流輩削平兩角誰令戴觀之  
無乃亦可憐從此翻爲大自在嗚呼鐘也何年成  
塵土茫茫空變更旁門寄迹恐非是人間重器誰  
敢爭當朝天子崇文學文瀾學海容濡濯已看碑  
版照千春還聞

木鐸推先覺鐘乎鐘乎得所逢輾轉移來入泮宮還知得傍琴  
樽刻不負從前水火功

甘泉宮瓦歌

銘曰長生未央

瑤池鸞馭不可迴金銅仙人人生遠哀百年龍鳳變椽桷但挾雲  
雨呼風雷詎知當時富貴極更願壽域中天開竹宮望祠夕徘徊  
靈肅然兮來不來房中神芝紫莖茁雲表玉屑金盤堆仙人  
樓居列萬戶太乙壇宇高三垓長生之求未云已片瓦亦擬皇  
心裁此瓦圓正誰胚胎胡桃油檮羅紈綻就中篆筆高巍巍龍  
螭四縮分隅隈想見參差萬鱗甲豈常焜耀千瓊瑰天巧不擬  
李菊奪字奇或許揚雄猜窮工極藝竟何有祇拚一墜埋荒萊  
何由椽筆啟泉壤更以楮紙塗松煤羽揚上林不可致香姜銅  
雀殊喧歷摩挲故物孰如此恍掠欄檻相追陪黃雲氤氲擬神

鼎英光蕩漾仍斗魁吁嗟乎蓬萊神仙安在哉窮簷赤子無餘財窮兵況與祖龍似故宮豈特雲陽恢五利六印鬼騰笑太室萬歲山嘲哈下詔我獨思輪臺此瓦存之同劫灰

覃溪師見示銅馬篇用韻奉答

昌也生長銅柱邊十年作賦何由傳譬如轅下羸馬奮迅不得力有時亦復顧影長留連覃溪夫子來堂堂摩挲眼力當風煙得我銅馬賦示我銅馬篇居然見賞塵埃前竊惟天地萬物一馬也牝牡驪黃何有焉世間識者亦恨少駿骨斷弃無人憐伏波將軍有見此中心感歎生愀然憶昔漢帝坐前殿將軍氣猛能酣戰力拓金弓滿明月身騎駿馬疑流電鳴鉦五月進窮海首鼠萬人遂革面事後平收賂越金甌中自守神明見一朝模範成全形萬里提攜向仙苑真疑造次名千古誰知鼓鑄心百



鍊吁嗟將軍豈有獨好爲此煩母乃深悲世俗眼俱昏枉自高  
矜古良樂反失側立真騰騫試看元精耿耿照人處形氣神骨  
一一皆可尋其源世上有馬果若此豈肯使之局促困苦生煩  
冤爲思此翁真嬰鑠銅船銅鼓俱開拓後人汶閭強解事坐使  
山川轉遼濶將軍愛馬乃識馬馬爲所用亦所樂古來相馬相  
士原可并名馬無人識名士爲吞聲所以昌黎痛哭戰國策至  
今奇氣凜凜猶如生昌也乃獲鉅手爲裁成能無感發中懷傾  
獨慚偃蹇弱劣未是超羣英未可雲路萬里騰驤行何以努力  
仰副知我情嗚呼何以努力仰副知我情

雲藏九咏

并引  
錄六

雲藏所居鄉也鄉在天馬山之下蓀溪之上北爲龍  
女峯東爲望海峯又東則銅魚之山靈泉是出其西

南峯曰海螺爲鐵冠巖兩山之間有瀑泉下垂者蓋  
又雲藏之南矣暇日周覽各成一詩

羣峯離合雲海同天馬獨起如雲龍鼓鼙西行十餘里遠攬奇  
秀凌虛空雲流雨洩千萬狀雖有變化無終窮極知造物鼓鑄  
力不數分寸人間功大石騎危已齧齧萬木枕股何濛濛連嶂  
崩騰首尻見陽崖豁敞明心胷晨朝景氣一澄霽交人以南欽  
以東五嶺南來入於海當復賴此司其雄惜哉謝公屐折齒幾  
欲馬退羞同蒙繫余生長好遊覽每望河渭思華嵩山行悠遠  
意蕭瑟歸來擁被蓬蒿中豈謂山林落吾手久矣斧鑿煩神功  
窮幽探秘餘恟恍欲語絕景誠何從猿猱呻吟鬼悲嘯松下但  
有斜陽紅因欲脫屣騎鯨魚飄然巨海浮天風

右天馬山

山勢西來若連鼇東走滄海臨怒濤凌厓跂足一掀首鼇背崛起天爲高我來入險先林皋十步九蹶謹以號攀藤援葛敢失墜安望騁步紆前勞蒼茫絕頂復何有下視九有惟一毛神龍上爲霖雨處海色昏昏連暮潮元雲四匝千霆鑒海風揚聲莽颼颼黑煙一點作人立鯨魚萬丈波心逃陰陽簸弄鬼物沮眼界豁落精魂超吾聞百粵袤迴萬餘里長山巨海相周遭中東西路詫奇險龍門氣象尤雄鷺瓊州雷州兩犄角往時轉粟飛千艘荏苒嘯聚劇洶湧門戶鎖鑰空堅牢鐵炮轟雷島夷震樓船激電長戈搽廊廟經綸豈得已更開叅府咨英豪嗟余學劍徒草草未能浪戰從弓刀逝將拂袖學仙去長嘯宇宙恣遊遨蓬萊仙客若相許願佩水玉鏘雲璈

右望海峯

銅魚山高一百丈山頭井深不盈尺銅魚飛去影冥冥空有長

熊作人立

是日所見如此

榛草寒荒浣風露松桂蕭條戀崖石巖虛壁

壓遺刻暗磴絕梯懸古苔漉淒涼氣象幾百年姜子書堂竟誰

識

山上有姜德文讀書堂址

位重平章何足道道伴伊呂聞在昔朝廷暇豫

直諫聲時事倉皇叩馬力奇才本自在山林編序未審何書策

平生負氣頗落落邇來望古還惻惻銅柱超遙邊嶠峙翼軫蒼

茫煙霧積誰憐海國空蜃氣

公有白雲照春海賦

徒爾山靈護礎石

山上柱礎

云是公書室物也

陰雨濛濛遠江合晴雲溶溶半山出林巒清曠無古

今公應未減真顏色

### 右銅魚山

流雲四垂雨微冥海風長吹春霧腥千峯坐失樓間形浮天脩  
眉一痕青誰從空際看娉婷樓間之人夢初醒礪松巖桂暮芳

馨何當采芝歌洞靈

右海螺峯

我浮凌江問韶石孤舟百丈緣江干江干巖石勢往復盡日紫  
翠蓬窗攢幽處時時舍輕楫捷足往往追飛翰危崖忽豁得真  
爽嵌竇相續驚奇觀玲瓏窾窳窓戶揭宛轉形勢堂廡寬白蝠  
鴉騰乳獸立蒼蘚甲脫藤蛇蟠深坳似聞虎腥熱積黝下宅龍  
身安火鈴流照氣先懾金鏡在掌神爲寒當時坐覺萬象逼過  
眼豈特飛煙殘豈知鐵冠丈人在許我舊好聯新懽我來未能  
同酒客桑苧書攜二三策已欣松枝落細細更聞石井鳴瑟瑟  
是時山意初風色徐看細雨來青壁鐵浪茶芽春早摘州境鐵浪洞產  
茶芽頗佳破顏一笑非水脈詎驚聲轉羊腸間最喜涼生麈尾側平  
生嗜險探奇意到此蕭然反冰釋窮荒物色感靈異萬里煙霞

思羽翮還應野服攜黃冠晚向蒼屏吹鐵簫

右鐵冠巖

石梁上橫五雲片澄潭下垂一匹練潭中靈物長有靈夜擘林  
石捎雷電天容黯黯盡不改風氣蕭蕭時一變千林雪落鳥聲  
絕百斛珠圓映人面吾家書堂深竹中亦有峯巒垂几研詎知  
遠口新雨後天半虹霓掌中見觀山未必觀水樂臥遊豈比行  
遊倦已看窓戶延虛照便擬茶瓜啓清宴誰能杖策俯潭聲靜  
聽鼉翻九龍戰

右瀑泉

龍門

驚浪到龍門連山大海吞樓船撐日裂火器迸天昏已見南交  
宅真同砥柱尊鯨鯢還可撼形勝數東藩

舟過烏雷門望伏波將軍廟作

樓船橫海伏波迴海上旌旗拂霧開自古神人當血食諒爲烈士豈心哀山連銅柱雲行馬地盡扶桑浪吼雷漫語武侯擒縱略漢家先有定蠻才

琴枕餅笙詩追和蘇文忠韻二首

虬髯麤豪臥華屋射虎歸來聽絲竹誰拋白額換龍唇更屏鴛鴦梢雁足東坡捧腹無一事飽食河豚血教漉薰風關門夢漸長流水浮雲肱莫曲

右琴枕

沙泉城南敵中冷月炭滿椽分焙笙笙簧得火字愈明我曲無詞差有聲水嘲火誚無須賡王子還丹金可成谷中風雨酣睡醒橐籥大小何殊鳴

右餅笙

海門春陰行

天水茫茫乍離合中間尙有雲層著泛舟烏雷門遙望乾體塔  
欽江廉江兩江岸何異千鈞力振之一髮高空隱日氣先澹長  
風駕潮午不落西上細雨殊黯黯東望春愁餘漠漠是時春半  
初起雷雷聲殷殷還厯厯試看白氣千尋耳霄處應有神物拏  
攫奮迅直上天門開鯨魚千丈何奇哉驚波噴浪從天來鼉鼉  
方怒橫魚驚空遲迴不知蒼蒼之中光彩倏忽是何所豈是蛟  
蜃蚌蛤呼吸變化成樓臺吾聞秦始皇昔欲登蓬萊鞭石成梁  
事不就至今登州萊州之民生遠哀因思東坡翁當年遊兩粵  
萬里羈懷天共遠千斛文瀾海爭濶不辭汗漫到儋耳尙肯栖  
遲來海角踪跡當時縱渺茫風景至今寧寂寞吁嗟哉丈夫生



世學神仙要當採藥乘樓船保我精華萬億年不然文章聲譽足千古何必方壺之中岱輿之下

海角亭謁蘇文忠公遺像

樓船伏波去已久炎宋下有蘇東坡坡公精神逮千載海山柱石吁嵯峨瓊廉歸途不計程當時暑月還經過茫茫榕林接霖雨日日大水迷陂陀興廉村南寺如洗白石渡口船迴棹誰言西國有歸鳳真使東人欣伐柯雪泥鴻爪迹漫似月餅龍眼佳寧訶月餅龍眼暨餅笙琴還從餅笙擬匏響未倚琴枕懷雲和愁來詩篇且復作忠義氣短夫如何孤亭城南秩南訛海門紅日昇陽阿蠻雲一破海光碧堯天萬里晴容磨公登亭吟歌復歌陟岵之望奚殊科楣間四字想飛動百年故老多摩挲公所書萬里瞻天扁十數年前尚存我生邊隅思見公低頭獨拜誠匪他長髯飄飄倚

杖立仰見顧我顏微醺忠惟天知鬼門破文如海勢韓山摩平生不陋姜子居此行漫比堯夫高人間何處有笠屐地上未許閒吟哦排闥天旋北斗柄騎鯨風攪南溟波翻笑防邊老飛將

馬革自褱寧堪多

馬革褱尸真細事公送梁右藏知欽州詩

### 化州雨發

雄雷殷鼙鼓駭電飛銅丸截水百萬石雲頭重如山茫茫一肩輿將曉荒郊閒孤城已不辨深林寧敢安倉皇問前邨路遠行復難中途屢回轉故鄉乃西看風從故鄉來吾親豈不寒吾親昔病肺參朮苦無關頗喜橘皮飲所得百不堪吾聞玉井橘朱實尙紅關何當采一雙歸承膝下懼茲行復匆遽過此空長歎

### 陽春崆峒巖追和石上吳雲巖夫子韻

古稱嵩恒岱衡華厥秩視三公誰其佐之河圖遁甲轉不言崆

峒朱明洞天次第列嶺嶠不知崆峒何以獨在西北聳峙凌虛  
空元精由來揭斗柄地勢空說聯峭渾我意太始自悅莽豈必  
洞壑真龍從况稱斯山宇內復有幾兩脚未歷正使擬議摹寫  
難爲工扣扉今日陽江東居然靈異栖其中我來輟棹推短蓬  
隔江雨過明彩虹筍輿十里不辭遠篁茆一徑微相通於時山  
外初午鐘羣石如豹如蹲能忽轉塵寰作福地豁然日月開庭  
宮石梁橫跨路迤邐水瀑飛灑聲玲瓏滕臂高垂蝠女掛玉乳  
潤極雲母烘神獅之白鸚鵡紅嵌竇夾峙雙房櫳斧鑿那無鬼  
神力結構不與人間功吾聞上古民質樸三皇五帝非尊崇所  
以黃帝廣成子心契元妙神虛冲梨聚自掃荆棘叢升高何必  
箕與嵩方隅丁壬候起伏枉向龍虎參鉛銅何如題字濂溪翁

山有周夫子題名

至精三五開羣聾寥寥熙寧溯元豐至今峭壁支罡

風鳴呼後來觀者但賞筆力雄擾擾何異冰疑蟲問君何處符

德充徒爾河陝甲乙分異同

山又有碑稱  
爲第四空峒

仲夏遊陶然亭同張瑞夫胡秋筠作

往時登高黑窰廠沙礫之外地阜層誰歟結構肆遊冶我來溽  
暑方上騰行人鬱鬱炎塼積高岸飄飄奇雲凝燕臺節物一覽  
耳欲出反畏羈愁增豈謂茲亭一來登風景夙昔猶堪徵亭東  
南北皆可乘高城抱日明觚稜忽然一山墮潭影山在潭西亭  
却承當檐一派墨痕浣連天十丈芙蓉崩吞雲洩雨有誰到仰  
視條想飛翰凌何由拂面涼風升亭下蒲葦蒼相蒸翠影冥冥  
遠煙入寒響瑟瑟微波騰蜻蜓閒黏蜩蛙雜鳥雀不去鷗鳬仍  
茫茫一渠翠濤湧何異水道苗初興南中田家重五月論說并  
許同來朋繫余世以爲農耨識字竊願記斗秤豈無菽水奉歡

笑亦有同氣齊愛增長夏合力踏龍骨晚涼攜手巡田塍禾深  
人行祇見笠隴底雉雉還張矰風交懷新雨送熟水上正以柴  
門憑胸中陶陶豈惟樂唱和乃復田歌能何由却作驥尾蠅此  
日大似鳩化鷹忽漫野草萌圻矜遽使麋鹿心情兢回眸南雲  
在何許夜夢欲返猶未曾對床人但賸風雨耦耕約祇餘邱陵  
冥鴻北來有垂翅寒日西走無長繩眼色迷離幾能畫遊情寂  
寞還如水歸來惆悵過蕭寺寺塔已見黃昏燈

南漢鐵塔歌李明府南礪屬賦

館垣新續鄭樵志 詔下郡縣金石徵李侯屬事有兼攝鐵塔  
先攷南漢稱訶林五月收暑雨東西殿角愁雲凝二塔分形體  
相埒三尋直上凡七層交龍翼柱兩鼎屈連珠結頂高峻峭千  
佛螺旋出寶號讀以梯桮垂金鐙重看僞號紀大寶董者內侍

隨諸僧誤文漸可灼屈指譌識兼得窮朱承

翁山竹宅所記皆有誤南礪攷之最

詳

想當鑪鞴金火乘炎雲漲天海風蒸二禺山童死灰出羣蠻

髓結脂膏騰兔絲吞骨甃殊慘龍泉瘞地崖須崩降王一挺竟  
先導功施萬載空無憑君侯剔抉有何意枉以翠墨煩濡繪吾  
聞粵功數銅柱遠溯炎漢新中興扶桑海綠望窮髮分茅嶠峻  
飛長緱歷唐逮宋此疆界交夷攝處愁凌兢歲時膜臘就培土  
意令蘊蝕難規繩胡不一介篤行李拓銘館閣供鈔謄餽羊在  
魯朔未去白雉貢周圖可增前人遠慮貴後繼大作無益宜小  
懲胡爲吾謀迄不用轉使刻畫吟秋蠅廣州之南海神廟韓碑  
傑出銅鼓櫃銅鼓無銘碑可上勝彼迷謬紛相仍君侯治壤矧  
韓舊碑版幸訪同服膺

張孝廉玉洲輓詩三十韻

鵬擊風雲冥蛟纏雷雨昏南闕倒文柱西翼折天門君子材何

懋神交素已敦乘蟾奔月竈登木馭朝嗽燭奮雄龍駕霆驚天

馬轅飛騰遺薄俗凌厲刷羣言揚吃交遊絕瀾狂眾口喧黃金

輕駿骨白日閉蛛軒率爾塵中覓因緣心賞論藏身萬人海歸

計一桃源自我還鄉國銜傷恤弟昆謂亡弟叔求原鴿心悱惻行鴈

子翩翻已美林居勝寧追蓬迹奔人逢五羊後淚裏九泉痕新

誅胡生痛謂軌同謙詩陳編粵子髡誰將繼前詰時第諷南園嗜泉

羣何嚇屠龍技最尊餘師拜韓杜感舊匹諶琨突兀中宵立光

芒萬古存單心傳絕業竭蹶恃長援雨霽子與飯泉開文舉罇

予規方藥石子日富騰騫詎意長沙鵬真愁巴嶺猿倉皇來永

訣悲憤惑鴻原衝斗神如昨揮戈日不烜哲兄徒雨泣帷帟自

聲吞我抱中懷戚來驚幽坎捫懸河崩一痛擊柱改三殮執感

鍾期聽招隨屈子魂傳薪道寧絕浩蕩問乾坤

唐中和五年李克用題名碑拓本

藩鎮禍結天無綱詔書所及惟咸陽么麼名字不復數赤心兒  
子終爲唐唐終大盜行虎狼誰結義憤排邊霜白帟已報官軍  
至鷄兒又覩沙陀裝勤王力戰各第一鴈門李氏京兆王太保  
司空位等耳進爵郡本同平章維北岳聳大茂蒼祠宇負若神  
貌莊四十一州在其下析代易定東西當幽燕主將未焚死鎮  
州小兒方跳梁思分鄰瘠更肥已不慮人怒兼天殃飛狐上黨  
天堪亢五十萬騎迴東方馬頭新城一戰拔易州守賊重駢將  
豈惟婚姻世誼篤要以忠義神心臧輕騎行庖酒酌廟刻石旌  
事垂渺茫如何回兵復北指遽使天子奔鳳翔和事雖慚謬刑  
賞報讎未免恣猖狂生平無忘上源驛亞子克念三垂岡功罪



紛紛許誰辨英雄落落非尋常高君模刻良有以夢溪著錄仍  
未詳人生留名豈容易要使翠墨生晶光目不知書古亦有後  
來吾愛王鐵槍

唐元宗脊令頌墨蹟卷

塵煙蔽天元武門唐家四海無弟昆詩人歎息何爲者急難脊  
令思在原逡巡三郎作天子媲美貞觀稱開元名垂金鑑播彤  
史樓成花萼輝乾坤花萼樓頭風日美麟德殿前花鳥繁花奴  
擊鼓雪兒舞琵琶朔管聲喧喧五王貴盛聞天下羣臣歌誦無  
間言神龍已報戲潛邸雍渠忽見當庭軒飛鳴行搖信得意飲  
食衍宴堪同論誰歟獻頌魏長史手足愉悅情相宣神藻飛時  
煥祥瑞天筆落處光瑱瑤趙明誠金石錄謂此頌天寶間刻石云和氣感召詎不  
信讓帝終始尤克敦誰令阿環玉笛竊遽使步幃金鷄蹲延秋

啼鳥最先起蜀道杜宇聲重吞長安繁華但一夢幾人跋馬追  
西奔惟餘寶墨照春色絕異歌板停芳樽歐趙題識罕辨證汝  
帖補綴空癡痕遙遙千載發長喟尺布斗粟空仁恩天寒長卷  
數開闔門外急雪看飛翻

晚入法源寺

南城雨雲散蕭寺鐘魚寂涼葉翳鳴蜩卑叢偃歸翼聊爲晚晴  
步惜此莓苔色誰念法源深悠悠不可極

大業二年鄭州刺史爲子祈疾記拓本

龍門大使七十發弓箭傳家非勁筆宮謎朕字已成淵枉向王  
甥呵試疾神龍潛淵未升天龍兒戲掌珠難圓虬髯未生有天  
骨豈有佛力庇護於其先晉陽宮中宴神仙汾陽宮前烽火然  
送官執兒誰可救深愛留得天相憐善相書生纔識面白衣使

者還相見太子空爲墮馬人  
姊弟翻成勒兵讎小兒黑色自乘  
牛真人紫色如雷電人無解甲士能饑身不及稍騎拔箭成軍  
進反廿年餘神助幾經殊不勅鄭州城北虎牢關萬人險踞天  
改顏昇高覽敵陣揮幡兩雄變色師崩山手詔褒勞不憂父宥  
覓爲男造像片石字迹傳人間吁嗟哉男兒身健十歲當騎馬  
十年之後聞天下記否雙王海寺前提攜禮拜仍書寫  
元年別有痼疾  
漫言功德庇家人自保英奇繫民社君不見金城天子不降  
時六月瘧疾秋繼之涇州之役敗我師媿煞大將劉宏基

蕭尺木楚辭歌

詩人無媒安問天畫手欲并前人肩誰云畫史胷次狹有此人  
物神鬼仙瀟湘洞庭渺風煙蒼梧北渚雲連縣屈子神遊向何  
處飄蕩恍惚凌風船天閤不開吁可憐鸞皇蛟龍空後先湘君

夫人環珮捐雲之君兮下翩翩幽蔽山鬼媚余笑作使狸豹空  
攀牽猿狖悲哀草木泣雷雨昏絕楓篁顛嗚呼重華不可作湯  
禹祇敬思其謨王佐霸功幾遭遇孤臣孽子多迍邐不聞讒鼎  
鑄饗饗共說饗雉私彭錢女媧鍊石補不到缺恨首在磨光堅  
搔首問之不得對無聲但寫愁詩篇古來作者俱精專妙手須  
附詞人傳略如蟬嫣有苗裔鬼才貯錦仙青蓮我昔長江浩沔  
沿太白樓高磯勢偏匡廬蛾眉接雲氣雲臺日觀紛鈎纏誰呵  
四壁出墨瀋七日不食愁咎鞭畫成長嗟果絕筆事過感激難  
爲緣再遊 京國今幾年蕭齋寄寂來僧檀讀罷想像得真契  
使我坐歎心茫然昔畫何減吳道元今圖何謝李龍眠誰能御  
氣出天地披髮往逐煩憂蠲

嵩山漢柏圖

風雪夜壓雲模糊有此漢柏撐雙株升堂把火照壁柱意謂古  
刻爲新摹輪囷拔地一千丈地接邛洛當中區高高太室幾萬  
仞產此巨植凡材殊厚地根蟠轉樛結青天影矗留紛敷黛色  
蒼皮幾歲蔭堅心拔節非時須黃河一夜變風雨搜山萬鬼號  
須臾雷霆霹靂自纏繞鞭鱗灼鬣無完膚一龍忽去有天意雙  
榦未拔嗟神扶吾聞封嵩自漢武千官帳殿羣靈趨將軍雄封  
睹三錫列爵不減秦大夫三花照耀等仙折萬歲想像同山呼  
茂陵仙去幾千載安榴扶荔皆已無惟留雙柏閱今古迴榦元  
氣根仙樞吁嗟動植有本性正直還應壽命俱託根山岳旣得  
所寫狀貞石尤難渝從茲萬古萬萬古出土入石同規模况聞  
嵩陽觀碑在怒貌渴驥爭先駢名山精靈記感應仙真鸞鶴非  
空紆何時讀碑采柏實更佩五岳真形圖

偶與安桂甫讀蘇詩桂甫用蘇岐亭韻見贈次韻奉荅  
風囊擁頰雲天飄傾墨汁不知龍蛇過祗見星斗濕袖手還虛  
空獨立不自得又觀古賢將師行利於急勇銳蓄人馬縱橫擊  
鵝鴨驍騰飽還營帳幕連雲幕於時公年盛許國寸心赤還憐  
好兄弟相依到頭白扶攜海南道洗濯黃州幘誰將忠愛思報  
以鬼神泣古人詞足法正在行罔缺况吾桑梓敬皆公鵬鶚客  
何當手一編以當題襟集

桂甫再用岐亭韻見示時方暑甚次韻再荅

吾鄉鮮荔子甘美更多汁亦有野湖蓮雨過初不濕三年來北  
地懷此終胡得書夢登湖舫隨波乍驚急橫篙起飛鷗脫衣弄  
雛鴨荷風送雨涼荷葉在頭羃沉酣不復醒落日銜山赤起來  
得君詩滿浮一大白方懷玉局翁散髮墮仙幘胡然鍾儀奏頗

雜下生泣人生得天全外物奚所缺宇宙一指馬光陰百過客  
曷若同莊生栩栩然蝶方集

洛陽宮第十九本褚臨蘭亭墨蹟卷

越州驛騎來蘭亭寺門花放齊春星云何昭代嬋娟子敢以姿  
制誇娉婷引卷全行二十八千年絹色猶明熒御風乘雲一千  
丈瑤臺直上連空青中有一人恣遊戲手挈帝女邀請靈竊藥  
騎蟾勢奔驟投壺激電聲琤玎歎如鈞天饗帝樂九奏萬舞句  
驚霆又如王會盛周禮鸞鑄鷺振紛充庭貞觀天子十二載洛  
陽宮坐開高扇御書特許申公賜想像褒鄂爭機伶於時昭陵  
猶未起繭紙不令臨摹停今之絹本匪捶熟豈不磨研雷餘馨  
况聞右軍鼠鬚筆法秘永師歸九冥後人書遲筆不問筆頭硬  
鈍如堅釘作力仗筆不仗腕羣僉瞽說奚堪聆試觀此書竟何

等左縈右拂隨潔淨剛強何能勝柔弱瘦勁要是撐鈴塢前賢  
付受有成緒歐虞老去誰典刑湖州筆工頗唐突玉堂舊聞搜  
禁經若能先識縛筆訣再辨蟹爪針眼魚骨丁

覃溪師座上拜觀魯公名印作

元老三朝欽大節千年畏日霜中烈英姿已拜畫圖開書府還  
看印章設書生學書記姓名登城劍甲當胡兵未從天子識形  
狀但有常山稱弟兄二十萬兵同日得胡騎漁陽勢崩迫賊奴  
高聳昇銀與靈武艱難傳玉冊何時奔走更朝天鬢髮蹉跎身  
可憐封事朝綱許誰說銀章雨澁竟徒然手挈金甌完復缺中  
傷排擠幾辭闕重撓宰相腹中刀誰吮中丞面創血吁嗟此印  
得從公祇押家人告絕封寧同敗節委諸將何殊倒印殉司農  
遺棺護送忠猶錄印史千秋名不辱丹誠應鑄首陽銅碧血疑



濡郢中玉九鼎真成一字重百身枉用他時贖携來當畫錦  
開更展公容酌寶壘願以公名印像左公魂應比大招來

渡洞庭湖南風甚正湖中有作

吾精不曾開衡雲連朝霧雨兼紛紛我冠不入三公府稽首獨  
禱洞庭君君侯南人特南庇風勢競曉清霞雲蒲帆十幅半空  
舉大似薦剡通慙慙同來諸船亦齊發又譬捷足爭階勲風帆  
如林迭前後沙岸過鳥空紛紛龍旌迢遙鹿角遠日車漸冷檣  
鳥分孤帆汎汎但中進乍見天水相細縵此時風急濤聲吞帝  
軒張樂猶可聞洪鐘萬石遠轟耳猛震百仞高穿潯湘陰磬石  
湘竹管靈夔作鼓鼉爲鼓魚龍震撼滿坑谷鬼神雜遝凌紫氛  
動心豈但北門客急節尙殷重華墳湘靈何來水邊瑟漢女似  
舞風中盼吾聞大樂本天地中聲元氣通氤氲莖英章韶相繼

作清明廣大非常云誰初咸池洩秘籥首尾不用窮郢斤帝軒  
之德照萬古我皇異世還同文隲詞從來貴忠信謁帝容易  
非虛欣我行遙塗紆正聽天關不見雄九軍軍行湯想營衛接  
先後幸許容成羣寧言浮湘問天客級蘭采蕙徒芳芬

長母相忘漢瓦歌爲張瘦銅同年舍人作

片瓦文傳面無缺團團壹似咸陽月咸陽宮殿幾燒燔漢字不  
同秦燼滅漢武當年建柏梁規模殊不下秦皇長饒濩瓦垂文  
露豈識窮檐飛夜霜蘭有秀兮菊有芳懷佳人兮不能忘佳人  
恩愛幾時歇地久天長無斷絕纏綿豈盡當時意信誓不殊朝  
旦說房芝承日寫奇文何似魚鱗屋榜綴嗟哉三十六離宮愁  
絕頑仙淚隕銅龍柄已隨風雨化壁輪猶藉蘚苔封我友昔年  
西命駕徘徊弔古藍田下詞賦淒涼類有情琳琅賚答知無價

平生此製寧多識蘭話堂中偶存一長生之篆義則同銅雀諸  
稱豈其匹燕臺相示幾驚吁還出新詩爲起予千里分携情不  
盡經年相見意何如多君此日携遊處秘省研磨當硯具待儼  
三篋史臣書更續兩京平子賦

癸卯五月廿四日叔弟諱日作二首

人事紛紜裏昏忘又幾時豈能無一日爲爾有餘悲聞淡千秋  
業蕭條五字詩詎須陳僕衍重許世人知  
十餘年以後身事更難論詎有脩名立空餘感慨存家遙寧北  
挈日遠但西奔賴有高堂健毋傷昔載魂

自製溫研小紙閣子送孫敬軒張葯房并系以詩

研池寒心冰起稜以火下炙或湯蒸湯蒸先溫後亦凍火炙石  
熱膠翻凝京居十載此云因試以小智求名稱書城面南百

堵與紙閣峙石方臺承閣高比圭長稍增長分兩間同一二期其  
縱祇與高相仍架構已畢孰牆宇繚以繭紙非文綾爰開北戶  
可研墨更啟東牖來受燈正南承陽光更二牖上各以琉璃櫃  
亦非琉璃乃越紙紙號飛雪兼千層閣成中空何所有一爐一  
研稍相乘爐西研東火氣升掠研北出如鵠鷹况復重簾戶間  
捲煖捲凍下惟其能媚顏或榜小暘谷柱句請列頭銜冰閣中  
春融墨海潤几上花發毫鋒騰燦硯無煩長者惜換湯詎使奚  
童憎就中香事更堪喜沈水一縷來無憑雲烟捲舒興已極風  
雪凜冽愁胡勝曷不紅鑪堆獸炭閒以屏帷施髹髹滿堂歌吹  
沸酒炙詎慮一研三其凌生涯落拓詎可說佳趣冷淡誰堪徵  
同年孫君真益友經義日日從鈔謄竭來同舍得張子醉墨往  
往畱縑繪聊爲出手製此物以致同袍先服膺兼成七字自書

寫但媿手拙同癡蠅

宋孝宗觀春雲詩蹟爲趙文學晉齋題

詩云春雲初起拂青林冉冉因

風度碧岑旣解從龍作霖雨油然而出岫豈無心絹本似紙扇上所書後有選得殿書印書蹟特工其詩或

卽題紙扇書所作也

南渡以後推賢主孝宗之孝誠堪數上皇邸中花宴迴選得殿  
前春日午萬幾餘暇撫蘭亭百本還能婉徽祖金漆屏開近御  
床諸道圖成列疆土文忠詩文一代雄殿裏披尋仍冠序表章  
大節更文豪足使斯人重氣吐書成還賜蘇嶠藏惜哉舊蹟無  
能譜斯詩何意春雲題此殿偏畱鸞鳳翥諦觀行筆更遲迴似  
感隨風乍容與對時育物本先王有心無爲自初古斯詩無心  
抑有情尙望從龍作霖雨極知求治正思賢還憶好文兼習武  
流星馬突過球門霹靂弦高驚玉弩朝廷雖小國要競將帥無

人臂空撫斯時得相亦可爲其奈洪周末堪語從來良弼關帝  
賚殷宗中興由相傳待時抱道亦有人退易進難非莽魯立朝  
未幾卽還山令人長憶朱提舉

京邸書感寄仲子弟二首

出門幾何時祠祀忘時舉夢承嚴親命悚息祭斯主升堂走跼  
跼羣弟奉漿醕伯叔各解顏長老咸心許亦有賓朋來揖讓雜  
笑語肥羊旣烹烹長魚亦登俎恍惚難具陳經營更延佇留賓  
賓不住出戶有微雨

吾家本農人人云食舊德云何慕人士識字喜文飾諸弟守愚  
蒙一人從京國果然迂拙性不克就程式小材念大用豈不  
撓與抑進退失其據俯仰何用擇徒貽鄉里羞詎有文字益不  
如服田畝甘旨其勤力

漢高安萬世瓦歌爲錢別駕獻之賦

黃頭郎去銅山合長安陌上金丸落那知更有古雲陽出得賢  
人差不惡殿中壺漏晝森沉階下儀容自賞心帝顧初迴金陛  
上夕郎還拜璚闥深出驂乘輿入左右貴盛何論旬月後從教  
恃愛等餘桃幾見垂恩深斷袖便辟柔和性本工賜休不出更  
畱中已許妻孥直鈎楯還聞女弟貯椒風全家上下無所夕賞  
賜何曾計千億未令題漆付黃腸且亟人工興第宅第宅成來  
北闕高重樓複閣連青霄珠壁堂階自輝煥綈繪柱檻還周遭  
有情得奉君王意無絲得會封侯事元雲泱泱沸河陽丞相小  
車翩出第郎官幾歲致封侯高安兩字百無憂自要寵榮傳萬  
世寧惟帶礪紀千秋堂開萬瓦龍鱗煥字本六書雲鳳篆想像  
華嶽日暎時何啻溫顏增眷戀一從西母奉籌唄無端新第壞

中門玉柙珠襦何處在蒼龍白虎信蒙冤此第當時作何狀此  
五千年竟無恙摩挲埏埴想精工還識婦翁將作匠錢侯篆筆  
逼斯水好古披榛遍漢陵未央甘泉藏棄富尤珍此瓦祕緘滕  
爲言董卿徒玩愒未如恭顯恣剝削從知但作可憐蟲徒跣蒼  
皇來詣闕獨有迎塵却拜人爲承風旨更投薪不及買衣收葬  
者象賢還作鼎司臣

十一月初三日出都次日過琉璃河作

琉璃河水似恒河照見行人髻欲睂橋柱未看過駟馬鐵篙元  
合伴漁簑駢車迴野黃雲暮回首重城紫氣多明日便行西大  
道不能東下順流波

通州大光樓

通州城北大光樓節使登臨闊漕舟薊水沙浮千里豁神蒼日



白二京秋中街掃粒從搬堤倚柱鳴鞭聽唱籌損益道深誰領會且看風景自銷憂

故關題僧寺壁一首

絕磴千盤險雄關萬馬回昔人橫戟地今日戍樓開元祐當朝

老明昌野史才自從題句後重見阮亭來寺內有韓魏公溫公遺山詩及王阮亭先

生詩刻

遊栢塔寺題亭前古栢

古栢何年立蟠根最上峯骨還拳老鶴角尙舞蒼龍栢二幹並峙如兩角

然滿谷清香合連山綠霧封遍山栢樹不下萬株皆向此栢亦一奇也未枯誰許識

聊欲問禪宗蘇東坡栢堂詩此栢未枯君記取灰心聊伴小乘禪

唐子畏摹趙文敏馬九十三匹爲徐明府仰之題

子昂畫馬真權奇文人妙筆非畫師三百年後江南客復有子

畏工文詞。文詞繪事俱第一。信是風流才子筆。平生趙馬幾追  
蹤。最有斯圖稱入室。九十三疋如雲煙。疎疎密密相後先。驂驅  
驟耳不復辨。令人想見分屯年。一人前進牽二疋。二疋肩隨五  
疋立。中間五疋來堂堂。更有黃馬當中出。此馬顧步何安舒。不  
落羣後不爭驅。奚官給頭初試步。似待使君畱駕車。復有四疋  
行小後。更有廿疋馳且驅。一疋滾塵五共槽。一疋聲鳴鴉鵲高。  
四疋回顧一疋望。未免心畱芻豆上。怒者三疋蹄齧驚。喜者四  
疋交嘶鳴。九疋不喜亦不怒。行眠坐起循其故。向後相隨十四  
馬。八駿之儔六駿亞。最後五疋來何遲。五花一疋雄殿之。就中  
駒兒數有七。毛骨成時定逐日。可憐諸馬應天精。行地真看萬  
里程。千金欲購嗟無一。百疋何妨尙未成。獨惜斯人貌斯本。材  
具雖奇身坎壈。可中亭上舞天魔。何似玉堂承旨近。使君牧民

求牧理害馬皆除爲政美黃堂五馬看一騾白面專城佇千騎  
憐才惜畫匪無因坐客題詩共有神慚無杜老丹青筆但作尋  
常行路人

夏縣謁大禹廟敬賦六十韻

天地初誰做憂勤在至人祇台還陽后丕續信由神尙想懷山  
日難將息壤陘魚頭看鬐鬐鳥足但踳踳荒度知承帝焦思本  
嗣親元祇方感格蒼昊轉彌綸遂有隨刊蹟真勞律度身娶繼  
過癸甲佐乃併庚辰萬古龍門矗千尋砥柱湮經營煩尾畫憑  
怒更雷震九曲遙流海三峯遂壁秦轅轅奚越板塊土自乘輅  
宛委藏寧闕支祁鑠竟馴陣雲衡岳望玉牒水宮隙加璧祠教  
瘞燔柴禮用禋厓看摩岫嶠篆并泐岫嶠體勢迴鸞鳳光芒耀  
火鶉大文彌億劫遺刻炳千春已信川源滌綠規壤賦均淮壩

包橘柚泗上貢珠蠙華袞彰天繪元圭錫帝珍平成功永賴彌  
直契誰鄰神佑焉枚卜人謀早博詢一中仍得統二聖遂傳新  
政以時爲大民將物共新山連爰首良斗建正逢寅寶鼎愁魑  
魅神龜敵鳳麟圖成協休德疇衍叙彝倫拜憶昌言喜甘因旨  
酒嘖齋延過四百苗固祇三旬汲汲寧湯導巍巍且舜均非常  
人所異無間道斯純茲土原安邑維初立帝闡中條開奧室鹽  
海注藏緝想像梯航人從容道路遵卑宮崇儉後服結効忠晨  
信矣爲民極於焉盛國寶一從徵夏諺遙爲舉南巡玉帛塗山  
會封壇霍鎮臻車專曾異骨舟負任黃鱗馭辨登仙域驟螭上  
紫宸穴奇畱窆石陵古斤金銀松磴重巒表梅梁舊水濱慕思  
餘喆嗣瞻仰遍羣臣更有青臺築從知望女辛攀應愁翠柏淚  
或洒叢筠風雨來於越波濤上鬲津飄飄歸故國睠顧撫遺民

祠廟今彌煥笳簫日更振餘風猶渾樸習俗尙忠淳自我遊并  
冀遐觀歷道榛河奔過洛汭山斷引梁岷劉子言良信商高術  
待申馨香隆俎豆瞻拜肅冠紳祗願分陰惜誰當亥步因臬繇  
疑擁篲栢翳况扶輪側想培元化端居峻玉真安瀾還有慶沛  
澤總無垠厚土誠同載高穹白比仁茫茫彌九域長此荷陶甄

仲春雪後遊瑤臺作

層臺高聳削瓊瑤飛步登臨切玉霄出郭晴沙讓鹽海

臺下白沙河水

流入鹽池則鹽不生故作堤引入五姓湖

連天春雪抱中條禹王城闕浮雲衛丞相

祠堂碧樹飄飄得吾宗携酒梳待收煙景貯詩瓢

時家福隆秋隆姪携酒同

遊

聞說中秋對月明臺前夜氣總心清卽看踏雪遊瓊島何異乘  
風歸玉京百里平田浮樹色千尋斷塔出鐘聲琳宮已絕塵氛

到誰料偏留過客名

過桃花礪數里至馬家河坻村形甚美再占一律

亂山環合古原斜馬姓居人近日家綠鬢富墟還柿酒黃河繞  
岸更桃花遙山已入商巖望近水仍將底柱誇縱有仙源人不  
到何殊天上望瓠瓜

遊龍門謁大禹廟題壁一首

萬年欽禹力千仞睹龍門山東至巒壯河驚氣勢奔晴雷冬亦  
奮白日晝應昏感激爲魚歎真首澤洞源

氣運將開闢山河待始終寧際天地性直作鬼神功雲氣摩青  
壁濤聲遶故宮安瀾欣此日俯仰意何窮

河津觀龍門歌

驚濤殷地聲如雷瀕河路折聽喧喧連天煙霧不知數西望一

氣連峯開峯如連牛亦奇哉豈謂河自峯腰來騎危路轉峯還  
迴地窮轉石蹶斯下天成巨閘高何崑仰看鐵壁形如墮俯積  
雲氣容如灰想像崑崙萬里導源至此偪拶不得出豐隆列缺  
乃駢應龍畫地鼓翼掉尾揚其頽崖開巖豁奚遲迴山口一石  
門還闕誰令千丈勢忽斷真見當時指麾萬眾雷輟電激轟鉗  
鎚河流怒噴風迴埃建瓴一瀉無垠垓長瀾千里更東下高掌  
萬仞從西摧吁嗟神功安可能雲雷合賴經綸才試觀千秋萬  
古山童水不竭於中禹蹟令人慨想心徘徊山前古廟臨危臺  
降神拜奠傾雲鬘雲松繞屋鳴作籟龍蛇滿壁昏成煤憶從酒  
澹諸沉災何意逝水還相催淇園竹竿下不盡宣房瓠子空悲  
哀我願元氣深滋培權衡迭運兼公台濟川舟喜盛時見清河  
頌許詩人裁

三門砥柱歌

我懷禹蹟徵隨刊洪河浩蕩從西看昨遊龍門歲已晏今來砥  
柱春仍寒塗迴茅津三十里險度雲磴千百盤陽光慘慘下幽  
谷陰氣漠漠吹羣壑時逢顛面負煤子示我塗路愁微單是時  
龍門春水下勢趁蓮嶽三峯攢桃花飛流竹箭急萬里欲負重  
溟寬豈知中塗正鋒銳有此列巘方城完崖開嶂抱何團圞雲  
屯霧積增巘岼大河入口不得去但有鬱怒從胸蟠何緣疊石  
還橫欄有不植髮齊衝冠想像龍沉冀州日詎免魚首齊民歎  
人門之闢良獨難螺旋珠轉愁飛翰雲雷日復晦絕壑神鬼夜  
更號奔湍峭壁旣囘仍如磐滔天直下洵無端不向中流砥一  
柱何由萬古迴狂瀾我來巨石凌河干未覩飛棹旋危灘羊皮  
渾脫是何物騎而度者方槃蹠因憶當時清曉疲舟船破碎民



孔輝平南圖籍亦漂蕩餘書簡斷兼編殘我知天公厭推轂欲  
使人力憑鞴鞍褒衣儒生幾得到哆口河側空夸謾茲觀上游  
去骨鯁又睹要害開髀髀固知神功水性得不用古法蘆灰乾  
注意桑經頗根據論循禹貢還山安行當華巔攬形勝會使涸  
轍矜奇觀

清明日出城擬重登青臺不果遂返有作

郊原新塚已纍纍又見榆錢夾紙灰西日有情誰爲駐東流到  
海不曾迴天涯遠目還餘淚

自余聞次女亡已一年矣

陌上遊人總盡杯莫

上青臺高處望塗山雲蔽粵王臺

十三州志云青臺者塗山氏女築以望鄉又云望禹故

云

登解梁至虞鄉大霧竟日望道左天柱諸峯雄甚爰賦

一章

蜿蜒中條山千里蟠河東迢遙接雷首振拔爭峭嶺  
瞻瞻明望不極黯黯看尤雄我發解梁城顛簸車凌  
風長風掃不盡積霧彌天空鬱然層霄間拔起千神  
龍鱗鬣不可見掉尾鳴雷公又如金鴉鵲羽翼垂  
雲封妖鳥腦盡磔礪距仍富胸誰移武當山還撐  
天柱峯王官真下壓五老方遙從更似來神人屹  
立重雲中摩天揚巨及衛日張長弓肅然真動魄  
盛矣殊難窮昔聞韓退之開雲祝融宮又聞蘇子瞻  
倒海頡頏神工二公唯正直信足稱奇逢而我亦何  
爲汗漫爾遊踪翻於境中處似有山靈通新詩匪  
奇叛但欲加磨礪何當重掃淨更覩青天容

蒲坂謁虞帝祠二首

蒲阪雄河朔虞祠忘歲時重華真協帝恭己自無爲  
暮雨連羣望愁雲去九疑垂衣儼如昨悽戀一陳詞

憶過蒼梧野因攀斑竹陰雲旗不可見湘瑟若爲心北渚愁還  
在南征怨不任故宮蘋藻處重爲誦徽音

風陵渡河

虞日生蒲阪秦雲接首陽陵吹風氣黑河混渭流黃已信雙帆  
矗真令一葦杭星源難可到徒仰帝臺漿

潼關

潼關旌旆拂雲開下瞰金湯勢壯哉分陝東連嶠塞阻大河南  
迫華山迴秦家勁弩還如昨唐代桃林洵可哀聖化卽今無內  
外行人車馬漫徘徊

登嶽廟後萬壽閣望華山作

連霄飛閣跨蓬萊峻嶽屏連實壯哉白帝雄神今日見巨靈高  
掌向天開羣山已似朝宗下千里真成望氣來願得凌風舒六

翻青蓮瓣上看紅埃

立秋日華頂作二首

層霄誰共跨茅龍絕頂遐觀盪芥屑白帝西來行萬里黃河東  
去避三峯晴雲膚寸收蓮萼樓閣千尋建鼓鐘莫問驚秋還有  
客從來登華正難逢

不辭旬月住峯頭好勝他山作漫遊高掌試看初上日芙蓉新  
倚半天秋雲岡獨立應千仞煙點遙分是九州厓壁一時聊爲  
泐鴻蹤此後冀長留

登華山落鴈峯仰天池放歌

我生身世殊茫然豈意得到斯峯巔四十年來但一夢五千仞  
上今青天天形冒地誠無邊地而流峙紛山川自非黃鶴舉一  
再豈辨紆曲兼方圓我初踰險登山來驚魂慄慄愁攀牽雲梯

朽圻鐵鎖絕衣袂始向三峯翩三峯傑出南峯先東西廼及南  
峯肩誰放茲峯一頭地秀聳卽在南峯偏金天崢嶸最高峙洪  
鈞鑄造非無權誰言四面削成好未睹一氣凝還堅是時開霽  
無雲煙萬里瞥目隨飛鳶黃河傾天正南下有此拔地方當前  
咆哮噴薄迄回首坐使一綫重溟穿秦山蠶垤渭一髮精驚八  
極心狂顛忽憶當時太白登搔首欲問宣城篇帝座尊嚴吾豈  
敢但想呼吸存縣縣傍人大笑亦何有安知我身非謫仙長嗟  
塵寰事馳驚共使白日空推遷眼中徒羨希夷子白首但作雲  
臺眠我當循池採紅蓮不然峯頂乘鐵船雲濤浩蕩恣流駛玉  
泉皎潔方洞沿時還下視人間子撫掌又閱三千年

登太室中峯絕頂謁中嶽祠敬賦二首

巍然巨鎮屹天中列嶽遙宗勢最雄秩祀漢儀昭盛典降神周

雅誦豐功靈壇肅穆風雲護

崇詞而庶分祀  
風雨雲雷四神

聖主精禋禮數

崇萬歲聲中還有慶好章符瑞贊

元穹

乾隆庚午歲  
屆獻廟並登歡致祭

上親

懸瀑千尋殷怒雷中峯萬仞矗雲堆松頭鬣鬣層巖合霞彩紛  
紛絕壁開天外黃河真浩蕩地中溫洛自縈迴飄然拂袂青霄  
上仍擬重邀鶴駕回

### 壺天閣

壺天高閣試攀登入峪初來最上層雲鎖斷崖青不落泉迴曲  
磴響還磨樵歌放去應知道經石看來欲問僧不是此中宿緣  
在塵蹤暫到亦何能

### 日觀峯頂觀日出作

天雞一唱海潮翻絕頂驚看曉日曦紫電掣時輝乍激火輪飛  
出勢難吞千尋絳闕應鼇忤九點齊州尚霧昏我自唏陽餐沆

灑誰歟高眺覽乾坤

歸途值雨小憩壺天閣

海雲將樹暗岱雨落泉巖昨定扶誰策今當出此壺徘徊仍踏閣彷彿更開圖願得三間屋長依五大夫

塞上秋陰寫望

西風寒雁自成羣絕塞秋容望不分大漠無塵通去馬長天如陣置平雲著鞭敢負平生意投筆空愁萬里勲自是聖朝柔遠洽不須還問李將軍

廣武城

太同南下萬峯奔廣武西懸控鴈門紫塞平臨哀角近黃雲高捲戍樓昏王恢在昔謀真誤李牧當年合自尊今日行人驅馬處貫城秋澗響潺湲

太原感秋用太白韻

古晉城邊路重來歲已流榆關黃葉冷汾水白雲秋出塞非投  
筆懷鄉自倚樓何人響長笛天遠更悠悠

忻州

滹沱東下會羣川風氣西來乍莽然山似連環包大野城如署  
鼓卧雄邊關心元魏分爭日刮眼沙陀戰鬪年更上龍原望忻  
口代雲高處待橫鞭

代州

三關形勝鬱岩堯代郡平臨控制遙軍閫威名雄震電敵樓飛  
勢接雲霄馬蕃更要騎能便士飽仍聞距易超試向武安祠外  
望靈旗風捲正蕭蕭

中秋北嶽頂琴基臺對月



中秋雲淨月華團嶽頂仙臺徹夜看不是瓊樓兼玉宇人間那有此高寒

大同府作

雲中日氣乍如灰劍倚天邊自有臺紫塞秋風隨馬度白登寒色壓城開禁中頗牧當時合宮後蛾眉萬里來飛將有孫還可念白頭仍作望鄉哀

謁韓文公祠

孔道函元氣天心待耿光嶧山還衍脈神嶽更儲祥世德全孤福宏圖夢篆昌礪磨真事業奮發古文章聖路追荒迹儒門屹巨防滂仁兼曠義樹紀并扶綱周昔衰仍戰言江墨與楊聖徒工放距異說爲懲創二氏來何自羣迷勢益倡求仙前古妄迎佛國人狂不有名賢憤何由至教張五原俱躡奧一表遂排闥

髮引千鈞重瀾迴巨手障偉功同禹孟高識過荀揚事與聞知  
并仁還大勇將先時從上相已佐剋淮疆鎮將兇尤熾王朝使  
但恆長驅踐牙距銳辨憚疆梁信翟儒臣効寧爲白刃當躬危  
因正直筆振自雄剛述作先秦擅流風盛漢芳起衰從八代作  
鎮向三唐星日照光潔雲濤接混茫渾渾仍灝灝正正復堂堂  
并約六經旨還窺數仞墻詩篇祗餘事李杜亦同行霞佩高飛  
燄天瓢倒揭漿兩間盈浩氣萬丈發光芒百世師應在生平遇  
幾償鉅重櫻倖佞身且落炎方海鯨驅還去衡雲蔽未妨鬼神  
原爲護辛苦特教嘗國策能無慟投書別有傷精誠天可格公  
道物還彰晚景開寬政享衢極侍郎易名堪紀實遺愛幾迴腸  
一自新書出翻令故里荒遺碑傳唐鄧古晉昧南陽合子畱銘

志

新唐書謂公爲鄧州南陽人蓋見李白作公父去思碑云南陽人而妄加鄧州字于上不知此地爲左傳所云晉殺之南

陽後人歷辨未決及明萬歷間發于和墓誌石于正雲孫敬梓  
縣尹村韓氏祖塋出土然後公之爲此地人物始定

桑 國恩從祀重 公自宋元豐後從祀世選報功詳憲訪公商

孫隨據所呈家藏公子和誌石入 奏乾 末學生南海聞風夙  
隆三年 恩准世襲翰林院五經博士

望洋況因梁苑客還志鄭公鄉 時余忝祠下欣趨拜階前許近

將泰山仍厚地北斗尙穹蒼岌業冠摩棟丹雘面沃觴隨遊儼

盧孟侍立或張皇大聖資疏附何人敢頡頏日逾輝傑構雲爲

護層坊河勢崑崙下山形渤海長鴻文與流峙千古未渠央

寄內

離居又近十霜期萬感唯應病骨支何事年來心漸怯被稜如

鐵夜眠時

孟縣謁韓文公墓

天文日星麗且繁地文嶽瀆脈以渾惟人斯文一得與終始詎

不關乾坤世生天人本天瑞星珠月璧幾同論麒麟吐書一千  
載復此會合當貞元上規皇墳肇邃古中溯洙泗開洪源兩間  
充積元氣合萬派欲納靈潮吞堂堂仁義起堅陣浩浩勇氣臨  
戎軒出關青牛想辟易馱經白馬應驚奔雄心伯益烈山澤隻  
手夏后堙鴻原浮雲之陰蔽白日帝遣巫陽招爾魂傲然騎驎  
大荒去大地殷動靈祇喧大行之南王屋東紫金百里龍蜿蜒  
長河落天包砥柱孟津破浪來龍門河黃山紫勢迴合中有白  
日佳城暄金山以後卽清濟貫河之處交孟溫前河後濟兩顧  
抱揭以嵩嶽尤雄尊於瀆得二嶽得一世幾有此靈奇存更看  
龍門接少室名山一氣排天闢天生地藏豈容易河環嶽鎮成  
安敦

公墓在孟邑西十二里韓家莊後山卽紫金山之麓紫金山發脈于清源王屋之山東南行一百六十餘里至是始盡公墓在焉大河經其前嵩嶽鎮其外太行屏其後濟水界其隈而芒山首陽少室緱氏伊闕大騶諸名山皆羅列其前殆

如天造地設者故云昔聞元凱營首陽茲豈自卜留子孫斯人位置自有

在神鬼呵護寧云煩惜哉歷朝遭兵火已軼舊表空高墻公墓廣可

二十部高可一丈六尺維歲庚午月既良吾皇時巡御龍轅崇儒重

道邁千古馳使祭墓來殊恩名香已接北極氣瑞彩遂約東

方瞰巨川心還喻渤解列嶽望總歸崑崙云何班范志地手雜

以里閑談無根祖塋尙遠奚必合按公墓自前明成化間耿侍

議見所題韓家莊詩序特未明言墓即在韓家莊之後至國

朝康熙乙亥所修孟志雖載公墓在邑西十二里韓莊而爲之

序者又云邑西北二十里尹村有公祖安定桓王塋其左臂一

高塚盜伐者遇有風雨之變私怪此必韓公真藏云云後人多

惑之者而不知高塚本名尹相墳其地與韓莊國典至重寧

後韓文公墓相去十餘里不得牽合爲一也可護按乾隆十五年聖駕巡幸中州遣內閣學士兼侍  
諭祭公墓即在韓莊之後此墓之前舉行鉅典是尤不得妄改也方爲邑乘諒有述重以固陋將何援秋中  
長雲盪飛雨明初片刻呈與璠吉日况得宏治鼎雲雷頗似周

時甌曰寺曰莊紀鄰并一金一石同麓墳應知精靈若響答未

許易置從辱掀余自去歲戊申因孟縣仇明府汝瑚姻親屬修

今年已酉秋八月十七日連雨之後公墓前碑出土洗視爲

前明嘉靖間邑令那賢謁韓文公墓詩碑并云展墓後憩金山

寺云云按金山寺在公墓東去公墓僅二里是爲公墓在此處

明證而是日又于韓莊關帝廟中覓得宏治間所造大香爐

一座其前款識云懷慶府孟縣韓家莊韓文公塚饗堂大香爐

一座重二百五十斤宏治十七年二月吉日造尤爲公墓在邑

西十二里韓莊確證蓋自明以前人皆其因偕同人薦蘋藻更

記公墓在是不得妄指在于尹村祖塋矣

碑神道勤墉垣仇明府爲公修理塋垣并于塋前復建饗堂又

書公神道碑立那無古堂轟山起尚有雙栢蒼雲屯公墓前古

于墓前故云株高五丈圍一丈二尺西株高四丈圍雷霆霹靂不得拔匠石

斤削誰敢捫嗚呼此栢及此墓坐閱人世同朝昏天心總爲盛

吾道地靈亦以昌後昆公後人蒙恩世襲五精神山斗并昭

揭靈旗風雨迴續緡高山從茲萬萬古仰者勿作詹詹言

夜坐

夜久天色青  
河漢在窓戶  
庭際有高槐  
疎花落如雨

至偃師謁杜少陵先生祠賦詩百韻

天地傳中聲  
風雅興歌詩  
尼山刪定後  
作者奚爲辭  
人性感物  
動生物息相  
吹吹萬不同  
聲叶律者其  
誰離騷本風  
變小雅致兼  
資大輅始椎  
輪河梁樂府  
詞建安挺風  
格入室推陳  
思過江數陶  
謝淩遲更陳  
隋靡嫚不成  
聲綺麗亦何  
爲唐初盧王  
與厥體號當  
時律詩沈宋  
競浮切空銖  
鎰子昂感遇  
篇古意初復  
追高岑三數  
公傑立堪相  
持均爲疏附  
才未盡前賢  
規恭惟子杜  
子神秀鍾兩  
儀詩聖旣挺  
生斯文還在  
茲側聞武庫  
澤雲初尙畱  
貽况復著作  
才句法傳孫  
枝賦就三大  
禮九重亦稱  
竒落筆中書  
堂衆妬寧敢  
訾紫宸朝退  
初曲江樂忘  
疲登塔數慈  
恩放

舟尋漢陂雄篇動鬼神明珠得龍驤愉樂詞難工此語吾謂欺  
使其述作手更於朝廟施卷阿詠鳳皇堂基循龐鼎一述祖宗  
功再陳王業基豈但燕許筆奈何君房癡稷契雖許身惠疇未  
云咨而况宴安久朝中政多秕十月溫泉開玉花雪中騎五月  
荔支紅驛騎塵外馳遂使長黃虬更化龍頭嬉煌煌黃金甌何  
意一朝虧鼙鼓起漁陽塵煙漲天隨青驪遽西行百官曾未知  
江頭但吞聲王孫罕完肌此時一升血已盡千生離同時陷賊  
人何由辨澠淄獨能竄身歸潔白無瑕疵何言睹麻鞋僅乃授  
拾遺誠節非有圖腹心願重披大哉北征作元氣高淋漓初陳  
戀闕心乾坤悲瘡痍繼述行旅傷迴首規旌旗家在亦何言妻  
瘦誠苦飢破樊嗟衣履狼藉看女兒深愛之所鍾流連固其宜  
而卽念至尊矧乃深憂危喪亂有由來鑑古陳興衰周漢與夏



殷明驗若著龜亭亭姐與褒但作軍前屍匹夫敢焚惑高天誠  
聽卑要惟意忠厚非同詞詆譏宏業樹太宗感述更吁噓嗟唐  
有此臣國步焉得移況於一代事書實多所裨國風雅頌作表  
裏諄推斯後來南山詠工巧亦不疑必若韓杜齊或者平淮碑  
若何房公救幾逐庭蘭萎華州作叅軍同谷更孤羈長鑣斷黃  
精短髮覆白眉弟遠妹不聞女殍兒焉醫迨乎秦州後所歷尤  
險巖長江下龍門峻嶺登木皮劍閣高嶂峻蜀門更難關浣花  
開草堂成都得栖遲萬竹臨江蟠四松當軒滋雖然縱嘯詠亦  
自關蒸黎况迺君不忘中餐時墮卮嗟嗟老賓客所需特憊糜  
奚偏將虎鬚幾同掩麟觚才人自古窮夫子尤堪噫霜巖先主  
宮風披武侯帷魚水憶君臣咨嗟涕漣洏圖走風雲檜栢森  
蛟螭高秋白帝城暮雨昆明池併作一生愁茫然千古悲扁舟

尋下峽就食仍無貲雲帆轉三湘龍馭瞻九疑南遊薄衡山西  
日迫崦嵫修文既有詔人生豈無涯牛肉白酒邊奚止高賢嗤  
同時謫仙人騎鯨滄海湄飯山日幾逢屋梁月仍舊微之論長  
句白也誠肩差及夫語堂奧尙未窺藩籬仙才世所難亦復殊  
等衰蚍蜉爾何物寧但相倍蓰重惟古文章質厚關秉彝忠孝  
苟不根文字空歲蕤惟茲直粹氣鬱作雄奇姿高爲歲寒松下  
亦傾陽葵長鯨旣海掣雷雨方天垂衆體皆集成萬古誠獨推  
吁嗟此椽筆後人誰得之士婁緬遺莊尸鄉見新祠瓣香夙有  
懷迷方更多岐願登大雅堂重問多師師

過新鄉作

飛樓出林杪殘雪被河涯野曠晨風下城危晚日斜多碑知近  
石崩墓識兼沙一笑登車去酤錢定不賒

復與諸君登大別山作二首

金鰲背上得同遊，萬里山川縱目收。蟠冢荆衡來一氣，長江沔

漢會雙流元圭想見神功峻。

山前爲大禹廟。

翠栢仍聞夏代畱。

大別山有禹栢。

見元吳來詩集。

自向峯頭瞻小別，雲煙袞袞似含愁。

左傳所稱小別山在漢川縣余昨至。

漢川訪安廣文桂甫同年至彼卽別。

沔口斜連却月城，蒙衝飛指大波橫。已看鐵鎖維天塹，况睹巉

礪宿重兵。增壘因高原，險固夾江爲。郡更崢嶸獨，懷子敬分屯。

處不特名山一柱擎。

孫吳時使魯肅守漢陽。

登黃鶴樓作

江頭忽見蜃樓懸，樓上平看鶴到天。句想前賢堪擲筆，人懷奇

氣卽飛仙。迴川風遞高帆過，大別山銜落日圓。欲更憑欄吹鐵

笛，翻愁送響白雲邊。

重登岳陽樓

高樓會上望君山十載人來得再攀  
仙客還疑倚神劍湘娥依舊綰濃鬟  
蒸餘雲夢知何極浮到乾坤詎等閒  
來路茫然難可記過湖聊看竹痕斑

登岫嶠峯作

衡峯首迴雁臨江初不高岫嶠特騫騰  
峩峩插雲濤茲嶽信神奇茲峯益雄騫  
崔嵬切雲冠奮迅騰溟渤還疑金銅仙  
摩天出蟠桃峯形如巨桃當空其下千青蓮  
跼蹐相周遭峯下羣峭俯抱絕枯似蓮瓣筆不可摹

栢斧不盡雲雷數來壑未諭祝融尊  
且放茲峯豪繫昔懷襄時洪波莽天滔  
神禹傷父功血馬登山號日照繡衣夢  
霞開金簡輶地絡已得要天崇茲告勞  
奇文祕龍鸞光氣驚後孫昌黎昔窮搜  
先笑後號咷歷本騷竊摹千鈞延一毫  
茲來歎冥茫祗擬

誰遊遨凌峯采石藥觸與歌詩騷絕頂還一登八極眞翔翺松  
風吹我行天籟紛嘈嘈旣已辭樊籠何用舖餽糟

峒巖峯磨崖題壁

嶽遊符夙志

余六年來  
遍遊五嶽

禹跡溯前經峯色餘濃黛厓碑閱古青

湘流環曲曲暮雨遠冥冥獨抱昌黎意畱詩寄翠屏

登祝融峯作

鷄尾負南海炎精燭天闔天南萬里山獨聳茲峯尊我來踏鴻  
濛載瞰扶桑瞰連峯鎖龍背九折升天門一跌更危崕垂脈方  
蚡蜺遂起怒猊勢蹶向中天蹲雲雷晦杳冥陰陽錯朝昏雄雄  
九千丈朱鳥偕翔軒穹石負雲臺青天正手捫日月夾東西兩  
丸交吐吞罡風何猛烈更似登崑崙羣峯鬱駢羅浩若波濤翻  
芙蓉與天柱玉友隨金昆紫蓋氣雖驕失勢還東奔五轉并來

朝湘江備南藩洞庭包九疑重溟擊鵬鯢精氣所出入大壑爲  
之根古初竟何道谷神會長存重華獨何之梧雲結愁魂悟彼  
騷人憂下爲雨翻盆胡不縱遠遊而自傷墮蜉蝣雲蹤第五山靈  
臺得本元人世自蜉蝣萬古同乾坤峯頭久凝睇一嘯天何言

祝融峯頂觀雲海歌

我昔太華騎茅龍高登明星玉女峯飈車雷轟五千仞下視雲  
海開重重後遊嵩少并恒岱閒值零雨迷春冬周流四荒渺何  
極復此南服羣山宗夏首來登曉觀日要比日觀稱奇逢豈知  
祝融最高處更苦雲雨千重封嶽靈飛精鑄元氣雲海一變舒  
晴容太陽開時金在鎔長風鼓處雲相衝嶽南嶽北兩噓吸樹  
頭樹底遙彌縫南海先成雲漾濃嶽僧云舊傳有南海北海之稱兜羅絲網堆  
擊鬆湘流五轉忽盡失但睹穀皺來溶溶倏如魚鱗疊不盡界

以墨色毫迴鋒渺然隨風似遠適更漾北海知何從淨掃長天  
祇碧落平鋪匹鍊如吳淞洞庭波濤遠莫接側耳近似聞洶洶  
自北而南忽倒漾大雲海合琉璃鍾圓鏡千尋徹上下瓊田萬  
里鋪橫縱祝融峯高聳螺髻青石壇古蟠虬松松從壇側亦倒  
掛放我石上支孤筇風意捎雲雲態慵一尖遠現青芙蓉忽然  
橫峯小露脊如魚戲水方險噉飛來石船在何許恍欲飛去還  
無蹤蒼茫變現詎可極真合盪我平生習奇觀人生諒有數幽  
賞物外知誰供倒嘗佳境似得蔗近想堂密非無樅少文名山  
願頗遂向禽空谷音還楚桑田滄海任多相仁山智水留懽悰  
昔遊低徊自惺忪雲嵐變滅餘蒙龍上封歸來日未暮一聲已  
動天門鐘

碧霞峯觀羅念菴先生手植松

長松孤峙古高臺羅子當年信手栽自有貞心扶日月詎無奇

勢軋風雷觀音羅漢留前記

觀音巖羅漢島并見先生高臺禪林詩序

元晦南軒得

後來

先生有題二賢祠壁記

不在朝堂在巖壑棟梁如此亦堪哀

### 秋思小詩

高風吹絕塞落水滿羣山秋思知何極客遊殊未還離人怨衰草幽夢惜紅顏永夕閨中月迢迢到破環

### 懷仁贈李星巖同年

懷仁高接大同城遼宋當時幾戰爭大峪連雲通朔馬平原燒草待春耕誠民未要防邊策宋遠應兼濟物情頗有故人紆惠澤直看樽俎勝雄兵

與諸君遊大別山寺值雨久坐寺側小軒頗盡江山之勝寺僧出紙求書爲錄黃山谷先生落星寺詩付之



因用此韻并題其軒

方晴不阻謝公屐一雨還催杜老詩遠浦帆來衝鳥沒層樓鐘  
響過江遲畫中風景身難覺物外心期到始知更學金華小三  
昧何如禹栢發新枝

昔人詩山谷書謂如長松出岫翠格千霄

輓陸耳山師座主六首

斯文如日月千載待扶輪閒氣鍾無偶名家世有人學還傳絕  
業天豈恡閒身失慟山頽後翻合感念真

才華原屈宋獻賦更班揚筆映薇垣麗名增粉署光星輶指汾

湖

師前會典試山西浙江

桃李並芬芳况復炎州路山川貯錦囊

師使

紀行詩成集

粵嶠持衡日羣才吐氣時九韶鏘廣樂

庚寅粵闈首題子天馬在齊聞韶二句

天馬

脫塵羈

闈中詩題爲天驥呈林

陸到山留色韓來士有師文章本公事衣

鉢是恩私

師鄉試舉第三人是科目得與選適在第三故云

聖治中天盛圖書萬卷成始知文運翊特此大賢生

乾隆壬辰歲朝廷

特開四庫全書館編錄古今書籍至癸巳歲師以保奏與今總憲紀曉嵐先生並司總纂殫竭心力登黜咸富所以仰贊國家

文治之精感蔡光照官移玉署清

是歲八月師以總纂提要勤勉蒙恩從部員改入翰林

爲本朝所罕見真異數也 儒臣數遭際何似更榮名

諸卿仍雅望獨坐更雄尊三載閩中去重乘使者軒冰壺從物

照歸橐靡錢存最感解裘質而令寒士溫

師嘗于歲盡值全門某以貧窘告遂解所

衣外裘付質以助凡在及門無不感激

何意遼陽道偏逢風雪寒齋書猶日向鶴羽竟雲端

師以今春正月奉

命往

盛京覆校文溯圖書出關後陡遇大雪路徑盡迷與行李相失獨坐旅店中且感中風寒猶悉心督率諸人校勘遂致

疾不起 盡瘁徵臣節無依覩士歎高名千古在願更碎金看

夥故云

書余少雲遺集後四首

奇樹凋零早名山著述深編題兄弟意遺集爲令兄伯符所編悲愴故人

心病鶴翻垂血潛蛟不作霖生平歌詠意豈謂但如今

少日森奇氣馳驅舞驕驄塵沙趨薊北河華薄秦中能事兼圖

繪名章聳鉅公戟門高揖處真敵萬夫雄少雲至秦爲撫公畢大中丞所贈

却憶愁吟處招尋古寺偏雨沉扶病榻風舉餞花筵少雲寓法源寺時與

黃君仲則招余暨張子榮夫安子桂浦爲餞花之約并作圖共題于後可歎金華客相携玉洞仙

經過酒壚畔何處問前緣

賴有難兄在還多國士知相看尙岐路感舊一稱詩因述懷貞

者彌將苦節悲伯扶述少雲所聘汪氏女素服入門矢志守貞兼有孝行云云英奇終有報亟

爲繼佳兒

早朝二首

曙色迎樓啟春雲覆殿齊  
辰居天極北圖益地偏西  
鳳管調丹陛鸞書燦紫泥  
勵精聞聖主望雨倍羣黎

御氣遙還仰天香近許聞  
千鳥翔省樹一雁度宮雲  
仗睹龍旗合班從豸繡分  
盈廷多俊乂何以奉吾君

題王石谷仿關仝太行山色卷二首

昔年畱滞在河陽日日登樓看  
太行雨過奇峯橫鳥道雲開峻  
坂繞羊腸吟來未用銷豪氣  
別去還如戀故鄉今日披圖觀雄  
梁何殊五嶽在巾箱

平生論畫愛關仝妙墨耕煙得  
繼蹤何意茲山傳北地正將奇  
筆振南宗雷聲殷地飄飛瀑黛  
色參天插萬松爲語蕭齋臥遊  
處漫尋三十六芙蓉

紀八月初二日雨

南州田禾重晚造七月農民心燥燥何意天開雲漢圖民生氣  
象成枯槁六月不雨至八月何草不黃況秋稻火輪當空勢最  
烈黃霧連朝紛不掃儒生局促不堪憂婦孺悲愁連父老州侯  
奉檄適遠行一社九鄉唯眾禱社西因旱成高臺帳殿拔起何  
巍巍鳴鐘擊鼓眾靈會香火照地神帷開少昊威神雄白帝上  
千尊嚴誰敢戲先從社主乞勾龍飛奏天門同白事誠求不用  
煩巫祝經術還從稽典記

時用董子春秋  
繁露求雨法

刻桐爲魚數凡九元

清脯膊陳而四蜿蜿遇龍九丈長發大白色居中央八龍夾輔

並西嚮五蟻不力容遁藏

是日覓五蟻  
蟻不得故云

時天無雲日正赤爍石

流金當午刻千人伏地同號呼白汗如漿敢巾拭香煙未斷風

泠然似有真靈下虛羈悚惶面血無人色凝望眼深還却立忽

然片雲從東來連聲列缺轟雄雷黑雲瀾空作深墨白雨迸地

昏塵埃高臺凌風勢欲墮千夫屏息顏如灰九龍頭角屹相向  
之而欲趁風霆上雲中羣龍亦下垂倒正縱橫同頽頽桐魚鱗  
甲亦飛動騰精欲激天河浪地動山搖撼五嶽雲崩霧漲瀾六  
合空中百萬羽林槍雲際千條金絡索砉然大震一聲高雨散  
雲收出天脚南山瀑布噴長虹西澗急流爭赴硤千頃梯田盡  
膏潤溝塍活水鳴東東禾苗旱久未青色蘇息已足覩神功千  
人稽首向泥淖共感全生出天造兼謂儒生術有神何許陰陽  
數堪道時占雨者謂五日後方得雨泉共嗤之爲言此事亦偶然若論神理非無  
權二人同心可金斷千家籲禱奚天怪試看神功茲響應應識  
生民同託命三策天人若許聞竹林繁露方堪竟

勵志詩示院中諸生二首

彬彬禮樂地肅肅堂廡深屬此徂暑交相從在文林火雲鬱成

峯驕陽赫流金緬彼畦中農耘鋤汗涔涔亦有道上人牽車走  
駸駸而我亦何事擁書坐長吟生徒復予賡鏘然韻璆琳氣類  
雲從龍鳴聲鶴在陰羣居豈不樂而仍惕予心聖道淵矣哉於  
何用求尋顏生儻不發何由示來今千載有濂溪與點同冒襟  
希顏况逸志空谷誠足音至教匪游揚契心在潛湛往矣荷蕢  
磬邈哉師襄琴

日月不待人寒暑如擲梭漸見火星中行復秋風多我年過半  
百志業兩蹉跎歸來對羣經感歎重摩挲昔漢承秦火風詩始  
萌芽易道既晦昧尙書最缺訛禮樂况崩壞春秋非一家區區  
馬鄭徒掇拾兼搜爬涉津豈無梁討源在沿波如何後代士抵  
隙兼蹈瑕說經用空譚責人忘過苛後生慙所問詎肯勲切磋  
兵農與禮樂一視謂浮華道術旣已裂異端寧責他窮經祇如

斯求志將謂何

七星巖李北海磨崖石室記歌

七星何年墮天高三山海上標靈鼇帝觴百神最高處鼓鐘鞀  
鞀分雲旄羣真獻壽帝不憚文采未曜徒塵囂山靈佇立一萬  
載毅然天上來人豪節如日星炳秋漢才如干莫欺霜刀高文  
巨製滿天下儒林根柢非殘膏穹碑百尺縱壯偉傑構未足觀  
吾曹誰磨巨崖一千丈層雲漠漠風颼颼金闕玉堂應記注石  
牀丹竈供爬搔至文萬劫自不壞況有勁筆駢雲濤象王力與  
神龍並金剛杵更羣魔壓熊熊南天覩光怪山魃木魅紛騰逃  
從茲斯巖頓增色不比靈異先藏韜卽論全粵亦輝映要與韓  
筆爭釐毫謂韓文公南海神廟碑語  
粵唐刻可稱僅此而已獨嗟高才旣天與胡爲缺  
折偏相遭試觀東宮被禮遇已有譏愿工營營封禪初成獻牛



酒水漿翻絕拘尸牢不有許昌義男子早已圭璧埋蓬蒿計賊  
功成作司馬嶽麓寺近容翔翺豐碑書成并鐫石黃仙鶴者名  
空明因知此記亦手刻名要傳遠奚辭勞重嗟地踣天麒麟長  
令老鶴蒼山號衆邪醜正竟安在入哀終等羣公褒

悅城龍母廟

牂牁壯南紀萬里趨鵬溟藤梧掠肇羅滔天浮雲星首尾孰專  
司中權尤神靈雄雄古康州高屋建重甍其東爲悅城雙山浮  
層扁左山龍楊威右山虎蹲形其北峯造天鳳尾開雲屏是中  
有神祠閱二千餘齡松栢挺高蒼篁竹含深青湧殿復飛樓寶  
闕爭岩峯鐘鼓帷帳具燈火紛熒熒巫言神之來其風肅然冷  
時而風雨交天地爲晦冥黑雲如頽山震雷行風霆蜿蜒五龍  
子出入朝殿庭云戀阿母恩依然供使令况聞祠側墳負土仍

餘腥奇哉龍性孝實謂母德馨潛氣陰陽通遠遊波瀾停連檣

千萬艘香火不遑寧惟神固有靈惟文亦有經如何下里筆遠

溯先秦型年代既渺茫徵召誰曾聽近人撰祠碑載秦始皇嗟

嗟趙李刻已逐飄流萍謂唐太和趙令則李景休二石刻已失惟餘元豐碑孝理

推朝廷亦越靖康守舊牒開新硯今祠內惟元豐中李繼宣碑

并賜額記二碑相具始末猶足並韓陵誰為判渭涇我有好奇弟奉慈來書

廳謂余六弟安去秋奉慈就余迎養於端溪書院遂為觀海遊下瞰扶胥陘去賜余與六弟

暨眷屬等奉慈謁拜于南海神廟并登浴日亭及茲奉慈還待勒烏蠻銘茲六弟暨次兒侍慈歸里

道過橫州烏蠻灘上有伏波祠壘嘗著於上遊者緬惟川涂遙追送沿長汀時余携三兒擬送慈

至德慶城下登祠攝衣冠酌酒傾壺餅再拜祈順風千里隨郵亭發

棹看采蘭及家尚餘奠神靈諒可懷龍醉當須醒出門轉風烏

兩岸看揚舠時謂祠後即得順風甚著靈異

送吳蠡濤俊由粵東廉使藩山左

百二誇函秦全齊得十二東海爲噶鳥亦不受楚制紛紛宋衛  
韓但若指聽臂齊桓昔創霸聲施滿天地要惟天下才實佐尊  
周計德禮振長策魚鹽興大利一匡更九合仁功匪一世儒生  
好空譚志士但夢寐 國家方全盛定鼎在幽薊兩海堪要絕  
萬里足橫厲屬者白蓮教延蔓頗恣肆初從荆楚起轉向西川  
熾雍豫雖防維民氣或凋弊 今皇受內禪仁孝超千禩經緯  
况分明銳思整神器督撫與元戎兼聞屢易置回思乾隆未至  
此已七歲邊省亦瘡痍粵東幸安庇實惟大吏賢正用清靜治  
我公在其間盤錯恃專萃明刑如臯陶達政比衛賜相得乃益  
彰不同實相劑前年攝粵藩兼權非小試去年欣入 覲陳謨  
况 宸契遂令藩大東實仗布嘉惠齊民喜得見粵士歎奚恃

唯公仁者心同仁方一視更將出奇略拯救見經濟富強雖霸  
術論政所不廢兵食既兼足民信復非僞用之赴湯火罔不如  
厥志東海更西河穆陵并無棣泱泱表海風足以固藩衛自昔  
燕齊合比作常山勢西可埒秦強南將甦楚傲 朝家需公行  
想此深有意平生管夷吾足肩天下事規模異江左風聲仍海  
裔時當報 國暇娛心或文字將同岱雲起不殊靈光歸餘事  
尚詩人依仁且游藝自慚一馮煖三敗同曹沫漢落無所成惟  
願甘粗糲何用加磨礱指南時一示

送孫撫軍寄圃玉庭入 覲卽仍撫西粵

國家乾隆數全盛末年楚蜀偏違命 今皇勵志討伐平別有  
殷憂緣啟 聖煌煌六合黃金甌東南際海明如鏡何來更作  
逋逃藪奸宄千艘恣暴橫閩粵兩浙達登來直抵天津途本賔

三時艤泊肆焚屠萬里沿邊勞邏偵嗚呼民命總堪傷況我粵

東尤不靖乃者太陰犯南斗遂致羅浮出梟獍鐵籠嶂子雖破

滅制軍輕生前撫病

謂吉制軍蒞道及

都延及內港皆效尤更與

海賊爲內應文員諱匿徒養癰武備廢弛難用令

重瞳南顧

劇需人謂公西撫多嘉政遂令移節莅吾東聲聞士庶皆相慶

吁嗟民慶公則憂廟堂制勝先人謀爲戰爲守判功罪進退咫

尺須深籌快心狼脘尙陸地況此大壑無涯陬帆檣迎風不得

擊風順各駛焉追求舟師火器居先頭船舷往來異沈浮轟天

大礮仰空發十礮九未殲賊舟况復武弁各惜命纔出海門多

逗畱經年無功但糜餉

國帑百萬捐東流何如用長令擊短

分守要害更番休憑險邀遮擊歸脣不用艤艫兼門樓兵家權

變在呼吸亦若運掌非冥搜况兼我可制敵命粒粟毋許洋私

偷沿海七省各關鍵守視不力皆虔劉昔年阮蕃饋賊餉今者越南爲彼讐進不能攻退缺食賊徒迸散寧再週我公沈幾正爲此亦復借箸前宸旒事權未一旦觀覺待時而動非悠悠自慚拘儒不經世先時亦欲效微計竊從主守附一言自古攘外先安內吁今劫賊方縱橫離城十里皆危地廣郡以港千百論夜行晝伏難窮治法在申明保甲令更仿周官鄉遂制十村一約約有司司者縉紳或人士先令互結出連環并許公呈解株累倘復兇徒乍闖入即可鄉閭同縛致南番東順并新香縣各如斯賊斯畏竭來食堪懷好音足使生釐無夜吠厥要尤須守土官時相料理毋疑忌使民自謀詎不爾食芹待獻遲仍未惟獻仍遲詎事情亦緣公有潮陽征潮陽械鬥事豈細巨案一破天爲驚爭桑釀覺信隙小蹊田奪牛真勢勑兩族相持爰禍

成詰朝相見先陳兵殺人如麻莫敢問王法禁格將奚行吁此  
惡習非創懲何由安良還保貞維匪千人就拘執維公再讞皆  
持平誅其渠魁就近地使彼日擊還思更爰除吾粵一大患腹  
心之疾誠非輕仍彈溺職縣逮郡仁者之勇真崢嶸迴塗又捕  
一大盜繫其父母兼諸兄

謂補陸豐巨盜李崇玉得其父母當兄弟崇玉雖逃竄然終當就擒

其訛言四布日謂眾十萬方橫行茲焉跳身但獨竄終當就獲  
何能生此癰一潰眾志定自可次第施功程忽來 天書許入

覲并 諭嶠右仍須卿南天春發北夏達東人帳送西懼迎  
猶忻兩粵地相接孔邇父母當重賡走之生也從僻壤昔年觀  
光幸一當緣瞻芝宇不曾忘已掃巢痕但堪悵昨來喜得二天  
戴更許諸生一日長優容禮數欣有餘枉惠訓言逾白廣送公  
真欲逕從公可奈牽纏不相放公行即日覲 天顏願代東人

陳困狀 天澤當同春雨來公恩且并南溟漲他時節制更重  
臨走也誦歌益神王

十八日過黃明經子實培芳書塾譚次爲誦聞履兒病  
二詩越日承惠五律二章云以解悶走筆次韻附來  
使以謝

羈人感故廬兒病况傳書爲訪無雙士還欣富五車勤心螭負  
羸是日觀齋壁所示訓課各條甚至拙智木求魚分手高城隔徒聽夜柝疎

雅有芝蘭契重貽金玉音觀濤同妙筆舐犢笑愚心况以天姿  
厚如傳風木吟原詩云緇令思罔極爲父因知江上水未比故最恩深使余增風木之感  
情深

送秦小峴由臬使藩浙省仍先入 覲四律 錄一

尚綱從來不近名頽然高穎舊遺榮蒼生已見須安石禮樂何



當待孔明信美湖山供管領最多財賦賴寬征東南民力今何  
似好爲君王達下情

嶺南羣雅

番禺劉彬華藻林輯

饒慶捷

字曼唐大埔人乾隆乙未進士官翰林院檢討改內閣中書著有桐陰詩集

甘泉宮瓦摹本覃溪夫子命賦

蘇齋主人今衛恒東南處處金石徵硬黃手搨出摹勒一卷溪石間登登攷古宏我以漢京甘泉遺字燦列星長生未央善頌祝不獨作賦于孝成因山架丁開萬戶封巒石闕交瓊瑩繚以周垣四百里雲雨一氣青層層玉樹神芝拂鵲鵲露盤仙掌當觚稜甌官何人富天巧丹鉛細碾沙泥澄作書小吏辦奇構匠氏毋乃李與丁一從神雀去不返凱門吹屋秋風零斷椽殘楬

盡龍化只此賸甌投蒼艇侯官舍人昔弔古石門拾磔看農耕  
作圖賦詩誦萬口遂移此物來書檠吾聞羽陽秦所銘元光陽  
朔蹟則承西京文字傳絕少猶篆遺法誰服膺後人從楷上溯  
隸誰知隸篆元合并分毫波磔辨直橫更擣墨杵濡黃繒空庭  
問字乞石潤雲霞灑霽圍寒燈

入都記別

竟作遠遊計關心有寢幃還愁惹別泪不敢濕斑衣惘惘將何  
語懸懸似有違河橋春色好回首白雲磯

大庾初程雪芒鞋幾日經梅花高下隴柳色短長亭遠夢牽荒  
驛寒雞念暮垌情知北堂雨此夕更難聽

有弟供藜藿長征計未非還將子季淚滴上阿兄衣水急鷓同  
遠江寒雁獨飛芳華各自愛努力報春暉

奏賦明光殿當年志壯遊名山窮遠覽詩卷助新謳海國三春  
雨京江萬里舟平生豪興在未用感離愁

韓勣王湖上騎驢圖

陰風夜吼樂平水江北江南盡撤備郾城已散岳家軍廟堂方  
割商秦地佳士何人爲國謀高鳥未盡良弓收一把雪隨字巾  
捲旌忠空賜湖東頭六橋春日閒遊冶酒榼奚童兩瀟灑忽憶  
翠微煙雨中蒼茫無復宜人賈武穆被難後人不收指岳墳但呼賈宜人墳景靈宮  
北黃雲愁懷舊亭邊湖水秋蹇驢瘦影歸來暮老卒花園睡花  
樹

桃源行爲陳淡園題照

陳君手寫桃源圖邀我爲作桃源篇桃源人跡不可到云是秦  
時避世之客存其間桑麻雞犬歷歷皆可數一如十里五里農

家村此語難憑真與假當時已無問津者劉驥已死好事少誰  
躡奇踪叩漁舍漢魏勿復知何論晉以下嗚呼自晉至今又復  
千百年桃源不見畫亦隨飛烟使君從何得此本描摹細緻窮  
林泉松年墨蹟已黯落世人徒誦昌黎作不知武陵太守所寄  
南宮生綃何處是水遠山迴想寥廓仙耶隱耶不可知妙語無  
過昌黎辭怡然問訊具雞黍黃髮垂髻識禮數月明伴宿思依  
依離別關情淚如雨此中酬酢一一如外人何但衣裝飲食與  
男女乃知洞天福地時時在人間桃源非隱亦非仙耕田鑿井  
皆帝力試問丈人荷篠何處能逃焉淡園靜者識此意自繪新  
圖娛桑梓釵紙局羅前軒如此園林豈非美吾笑歲星精殿  
前執戟長安米吾愛謝安西東城別墅東山妓蹉跎難鑄六州  
錯婚嫁那無十日累五畦菰三徑李有園未荒屋未圯何時歸

鍾緣溪夾岼城西負郭田日著烟簪看花紫

警堂觀察校定拙集用前奉和天馬詩韻題後仍疊前

韻賦謝

龍眠畫馬如真馬摩詰作詩如作畫天閑萬匹皆吾師何況登

壇會齊霸西江詞伯人中杰題詩讀畫皆精絕雨前雨後一壺

雲江北江南半窗雪

用警堂集內渡布周江及贈蔡南屏寓齋詩句

更掃驂騑勢出塵

百四十顆驪珠新騰驤磊落九萬里真看天上行麒麟憶昔馳

驅踰隴坂鎮遠樓高矗天漢書生籌筆事千秋橫梁風流生顧

盼生平許可原不輕秦黃謬譽蘇門騰他年更携三百首與君

重賦蒲稍青

寓齋讀書

下直歸來便讀書老生結習未全除兒童又報煎茶熟竹影橫

窗月上初

宅近宣南槐市街  
牆根新雨長  
葦青槐花風裏間  
敲戶知有門  
生問字來

嶺南羣雅

番禺劉彬華藻林輯

張錦芳

字榮夫一字葯房順德人乾隆己酉進士官編修著有述

虛閣詩集

玉壺山房詩話葯房天性友于少與弟瑞夫以詩齊名旋  
失雁行中恒悒悒登第後聞伯兄計齡限乞假歸未幾卒  
於家學問淹通兼工書畫詩宗大蘇上溯韓杜卓然樹騷  
雅之幟論者謂直可接武曲江談何容易要其才力富健  
氣韻深醇難以魚山絕大之筆二樵絕奇之才聯鑣並驅  
莫相先後以之追軌抗風夫奚媿焉

觀音巖

絕壁蟠水府青冥插垠堦巨靈一掌怪千仞忽中鑿石勢儼赴  
人虧蔽暝晝錯籠燭辨層梯偈仄試腰脚幽造逾宵祿積鐵立  
如削穹窿覆層顛失勢駭一落微泉逗石罅清梵度虛閣鍾乳



檐際垂秀若蓮發華憑欄一揮手俯見千里壑晴雲洞門去伴  
我向寥廓巖棲焉可常風寒日光薄

度廣嶺

悵離兩浹旬衿瀧達重嶺凌晨度嶺去重似別鄉井草木餘暄  
妍雲羈變淒冷兩崖穿一磴谷午見光景出關浩無依俯視攢  
衆頂緬懷開鑿日雨騎不容並至今羈旅人南北互馳騁長林  
本閭寂絕礪自幽屏應緣物不閒巖壑亦難靜颺颺孤松幹遠  
配行客影未用記往來勞生道途永

筒車

篷窗喧午枕彷彿灘聲似湍流激轟轟石角聚齒齒巨防快一  
決樞軸空中起寧知水轉輪翻以輪役水聯聯銜尾鴉一一墮  
磨螳岸南急雨灑岸北長虹倚地形限灌漑人功相高庫長資

不盡源注此無停軌吾生慙俯仰方枘桔槔恥未敢薄機心沿  
泗望沙觜

潞河阻風

長隄浩漫漫百里斷林藪炎熇閉風力決起朝怒吼吹河河氣  
黃半掣驚沙走舟行轉冥晦歛蕩觸重阜幾日發交亭計程望  
海口豈知川塗初郵籤遽淹久淹速寧有數適與颶風偶推篷  
苦眯目埃壒不容帚却憶踏軟紅堀堞隨馬首舟車等蓬勃垢  
淨亦何有明當候輕颶津門指烟柳

金山中冷泉

岷峨江勢浮天來江心澤浮泉穴開江流泉味兩不雜如玉在  
石殊胚胎寒泉本自山下出云何捲入洪濤堆清冷似爲真宰  
惜品格未受蛟龍脰茫然萬頃護一勺石罅幽絕不可開夜闌

斷渡羣籟寂泉眼發見如瓊瑰孤蓬風急江更永銅餅脩綆誰  
施哉山僧行汲味真贗亭前坐受幽人啗物無正味祇俗說并  
滌不食非泉哀興來步履登古臺我飲不用瓶與壘長江一口  
吸欲盡海門却望浮如栢清風颯爽生兩腋胸次不復餘纖埃  
時無菜芋莫與賞月明獨棹扁舟回

### 焦山

浮玉東來十餘里山如青螺樹如薺微茫一點浪花中古戎橫  
江障江水江流搏激生驚濤江風海雨爭怒號天地晦明異瞬  
息慘淡發此胸中豪海門兩山浪所淘卷石豈亦煩巨鼇潮頭  
驟慙加束縛始識下桶根株牢蒼鷹叫風鵠橫海江豚突與魚  
龍遭層雲莽莽壓絕壁回視萬木交櫛慘乃知此山信孤絕荒  
寒自昔無游舫誰與真境擅獨得饑臥不出成逋逃三詔洞前

仰睂宇人與崖石相清高而我遠行心煩忉伊誰強起空自勞  
凭欄倒瀉千斛水洗此倦客愁煎熬風雨過若人事散靜覺歲  
月流滔滔海雲堂中坐寂滅江聲何事猶蕭騷

北固山甘露寺

長江雨餘洗層邱山根倒挿江中流却臨三面俯江水金焦兩  
點如浮鷗浮雲北去廣陵郭風烟漠漠南徐州五間亭屋未蕪  
沒磴路滑上寒飈地當勝絕發遐想詎有舊物資冥按蕭公  
衛公遺迹久塵土而況吳陸畫筆追僧繇如羊石亦不可識但  
見孤塔湧出凌滄洲鐵花澀繡暈苔蘚元豐世遠誰研求霜髯  
坡老天人儔今古憑弔生煩憂變遷又閱數百載俯仰已失當  
年游茫茫大化日夜逝萬事過眼真浮漚何如江山獨不改多  
景天與開雙眸江城如畫翠一色地盡楚尾雄吳頭時來足助

慨畧事去亦有興亡愁我今身世同虛舟來非所及去不留  
當前不醉京口酒客心搖落寒江秋

寄暢園

入門環眾綠水樹同一色泉伏引淙潺山圍借寒碧烟霏襲游  
袂漠漠秋陰積軒楹動波光精室生虛白喬木如古民蒼茫飽  
閱歷對之不敢撫仰望自嘆息悠悠往來中我亦片時客一身  
逐幽趣何處無陳迹

偕李正夫夜至虎邱

純綺與林泉殊情豈異地幽人與世俗相雜還相避山塘路迢  
迢夜出無所詣海涌山前水乘興攜橈至梵鐘寂不聞歌舫亦  
云逝衆生隨日息巖壑悄如睡空餘劍池月清冷襲衣袂此景  
誰復愛物我各有嗜不如兩忘好喧寂其此世君看鶴澗古來

者可勝計惟有吟風松蒼然發幽意

峽江

孤城一角界崔嵬江湧銅鑼浪作堆風急片帆迎峽轉日斜千嶺送秋來巴邛雨雪淹前度玉笥雲霾闇未開歸去揚舫天暫許浪游心跡首重回

偕瑞夫游峽山寺時胡同謙後予入峽畱詩示之

南禺草木青層層似與北禺爲翠屏北禺連峯若盤几中均恰受花宮凭歸人入峽正霜曉初日遠傷山堂明淙碧軒前灑秋瀑天風吹落環珮聲却尋仙源步巉杪清響下激長林鷹造幽無人興逾濶導我尙有林間僧盤盤石磴淨朝色官官蘿幄寒巖肩路窮境絕雙徑合古寺高踞如建瓴鼪鼯跳躑猿狖鳴半空飄墮松桂馨峽長山高望不極天光水色交澄清昔我來思迫

冬暮攀尋未已催江程胡君吟成憶同好遠示子季疑相矜二  
禹奇秀豈易盡似待再至尋前盟得甫詩繁昔張憑船風利不  
得爾北歸集同好茲游庶可  
又云差池倦羽知難并與君偕還俯軒櫺重來尙爾快新獲而  
況三年魂夢長牽縈卽茲浮蹤感人事未用宿約慙山靈懸知  
後來艤歸楫俯仰遺迹同此情聽泉聞梵尙有會爲我一濯滄  
浪纓

翠巖

行行越雲畦眇眇墮空谷峯隕澗常陰崖合徑疑東方冬尙蒙  
密流潤蕃草木嫣然雙紅芙點破一巖綠石梁微風入坐對雪  
色瀑泉原不擇地無隙猶滲漉一綫忽斜飛中實乳千斛蹇步  
苔痕捫鉤衣石稜觸仰穿類出井回眎歷其腹憑高氣逾幽欲  
去延深矚村路不逢人茶烟出茅屋

登大科峯

大科視羣峯前矚但相況攀躋失常徑陟險情未暢意中有全  
山行尋出雲上萬景隨步濶望眼始一放餘峯菌萑披面面插  
屏障烟嵐不外散變幻各呈狀芙蓉七十二茲實丈人行始知  
雄獨姿未用矜奇勑積水外盤繞長風中浩蕩候日羅浮巔東  
西此堪抗會待天雞鳴深宵策藤杖

中宿峽

峽深得古春草木鬱蒼蒼一隅有佳色飛墮扁舟旁南崖迴哀  
猿北嶺傾朝陽篙師息比捷綫路爭毫芒俯擲百丈牽絕叫度  
石梁梵宮舊攀歷魂夢猶徜徉阮俞有遺徑清音散琳琅帝子  
杳何所孰爲來鳳凰至今明月夜竹實多蒼涼閒雲自來去石  
壁耿冷光出峽一散愁日淡江荒荒



大廟峽

一重複一掩巨峽神所寰絕壑驟駭人山骨皆堅頑靈祠耀朝  
日玉貌朱旗殷指揮掃妖氛何況諸猺蠻餘威入木石慘淡朝  
神姦底用獅與羊滅沒蟠蒼灣弭節高堂居豈念途路艱當行  
詎遑憇風竿要環環道殊理自隔悽我游子顏

滇陽峽

午風峽角來掀篷入皋石兩崖作門立拔起虧天色巉絕無寸  
膚巨靈何由擘架閣信奇構斷棧少遺迹惟餘縈牽痕磴與猿  
狔借湊流左合滇勢欲羣峭敵轟轟不受縛拘怒久未釋灘石  
紛橫縱似爲奔湍激子心偶無競俄頃視順逆雷驚與電搏供  
我一偃息飛仙安可從寄言謝樵客

彈子磯

英石足峯巒奇詭不相擅化工通全巧鑱鑿闢生面神鞭走虹  
霓月斧磨雷電千巖構一體厥勢乃得半筓猗猗猗落慘淡虎  
豹變蔓垂蒼雲崩乳結蓮影燦嵐靄無定態天日借餘絢漾舟  
錦屏側氣王目爲眩灘前萬圓石一一落金彈可憐巢頂鴈永  
脫虞網患呼風側兩翅遠視似無戀絕壁誰能梯峭帆掠江練

望湖亭阻風

二月楚江寒亭高俯急湍雲能藏嶽大天自入湖寬古廟喧蕭  
鼓神鷹各羽翰舟人祈禱拙持檝欲行難

大風渡鄱陽達大孤山

蒼茫左蠡來長風船頭五老雲蓬蓬粘天白浪如山崇遙山却  
逐波濤空兩帆高張捷於鳥欲濟無具貪天功東鄱西鄱望本  
通萬派直達湖口東大孤搏控不得住蒼崖滅沒迎孤篷戢戢

道人冠擲下萬頃中須臾騰躍露首尾微步亦與凌波同烟鬢  
遠近意態濃物外摹擬良難工瞥然一塔失孤影天長湖遠浮  
鴻濛昔聞分風奇上下馳帆楫今來靈颺恍獨得夙程暫泊非  
終窮推波助瀾不無謂天意欲洗淹遲蹤大鵬六月豈久息雲  
夢八九開心胸茫茫太倉一稊米大孤孤絕誰爲雄詩成不用  
乞如願浩蕩江漢來朝宗

### 石鐘山

湖流怒撼山根動九派西來助豪縱年深石骨如枯株老榦槎  
枒內空洞萬籟初沉兩崖應一聲乍入千山送打衙真笑鼉鳴  
窟起舞未許蛟蟠壑孤城雲去自嵯峨傑閣客來當闕空蒲牢  
忽哮金奏作巨壑無風濤浪湧函胡清越真瑣細纖響笙簧奚  
足共洪鈞吹萬各自悅物以善鳴爲其用寸筵未許發噌吰千

石何堪較輕重小舟絕壁無人問萬竅驚號出奇弄蓬萊想像  
聞妙聲回橈忽作釣天夢

小孤山

大孤浮如鞋小孤立如髻峩峩翠鬟聳浩浩白水逝靈祠倚陽  
崖初日雲霞麗餘峯列垠堦峭絕不容憩東南指彭郎羣岫互  
連綴神女慕高潔獨立風吹袂雜佩鏘琅玕幽芳抱蘅蕙粲然  
罕儔伍面面絕屏翳長江千里來飛浪濕天際俄然就束縛控  
此一柱細客舟更孤絕浩蕩無根蒂吳頭楚尾路帆弱誰與濟  
潮信來何時中流撫身世

大雷岸

朝掛馬當帆暮及大雷岸低篷倦枯坐孤嶼愜奇翫九派日夜  
流吳楚千里判落霞與斜日并作江光亂絕壑抱鼉鼉飛湍散

鳬鴈菰蘆風外響坡隴雲際斷咽于雜眾聽蕩汨無遺盼夙聞  
窺地門頓若滌銀漢流觀信清美客子有感嘆水枕淹程期風  
潮其昏旦心孤慕儔侶險絕怯傭僕詎無書一紙莫遣魚尺半  
遠愧鮑參軍我遊殊汗漫

皖口

一折中江壯三峯南嶽尊客程吳岸出春色楚雲屯風急帆無  
影潮來月有痕舒州形勝地莫使動征魂

月夜泊燕子磯登絕頂

危磯聳江麓鵬喙兀孤撐江流啣其根勢欲相憑陵不敵乃南  
徙去若掉尾鯨至今俯磯底浩蕩猶江聲秋色千里來鬱鬱金  
陵城遠視白浩浩焉辨揚與荆江介多悲風風拂石燕鳴孤根  
恐飛動客棹將何憑中宵更振策不寐看月明酣歌最上頭應

有蛟龍聽

次瑞夫禪智寺韻

渡江少名山尋子舊遊處竹西歌吹絕修篁雜嘉樹臺荒翳蒼  
榛門古闢甘露深院聞棋聲戶外閒一屣蕭然但松籟幽絕感  
行路蜀岡二度過風景宛如故朝吟莫與唱夜寐還獨寤一尋  
方外侶暫愜逍遙趣正似子來時野逕無人遇妙香聞檜柏靜  
意到鷗鷺獨往莫神傷更泛清淮去

采石磯太白樓觀蕭尺木粉圖山水歌

一峯豁達天門開秦觀越觀窮八垓兩峯掌蹠青崔嵬蓮花簇  
簇圍蓮臺二叢八十四盤裏五老九疊屏風隈名山宇內各雄  
獨安得浩蕩雲氣一室相縈回樓頭嵐靄互出沒影落樓下蛟  
龍脰乃知畫師巧爲此意匠所發萬里能兼該驅山走海不藉

如椽筆中挾謫仙一片精靈來謫仙何處游生長懷離堆平羌  
江水半輪月青溪三峽光皚皚竭來落鴈一搔首呼吸帝座窮  
嘲詼四月上太山玉女下酌流霞栢興因廬山發雲松巢處盟  
丹崖茫茫八極盡揮斥狂歌縱飲誰能陪蕭生偶然般礴畫向  
雪色壁遂覺錦袍烏帽蹴踏長鯨迴尋仙五岳豈易事鞭笞鸞  
鳳須狂才高人定爲斥鷃笑浮世大有醯雞哀青山采石亦是  
投跡地後來至者荒蒼苔但當撫琴動操看此衆山響且莫掛  
帆牛渚瀕洞爭風雷

戒壇古松歌

去山十里聞涼風斜徑踏上浮嵐濃古壇面面對寒碧崩雲匝  
地青叢叢樛枝磊砢四長松云自遼金之代畱禪宮一株竦直  
摩蒼穹勢欲盡凌千萬峯一株下覆如幘幘當午曦景無由逢

其餘鍊幹盡偃蹇驚蛸下走垂長虹鱗甲飛動意頗同蒼茫各  
自行虛空一聲鶴唳出巢頂仰視不見烟濛濛自從燕地來郊  
野未睹冰雪容報國門前舊有兩樹古支離厭臥塵埃中性便  
林壑苦城市合與高士長相從深山大澤養神物盤踞得地非  
人功崢嶸歲月一回首閱數百載猶忽忽壽安相望高穹隆舊  
植亦傳金章宗安知拏攫起雷雨不與西嶺遙相通惜哉茯苓  
千歲質未許荷鍤尋幽叢山僧只共歲寒意獨客誰伴天涯蹤  
義山詩高松出眾  
木伴我向天涯茫茫配爾亦俄頃翠色飛墮蟠心胸深宵定  
借蒲褐暖聽此絕壑吟蛟龍

望九華山時風雨初霽山頂皆雪

九華之山山九峯峯峯爛若銀芙蓉何年太華玉井此移植散  
作九十九點高龍從茫茫八柱齊跼蹐搖青空人間風月不可



到帝斥滕六驅豐隆盡翻珠玉作瓊蕊然後九枝一色交龍葱  
天半兜羅綿爛漫安可窮晶瑩一掃碧埃絕千丈倒影蛟龍宮  
自非錦袍烏帽謫仙人名山焉肯爲君容時無儒林丈人真學  
士面目誰解攜壺中劉郎未識奇與秀晚向荆山女几迴孤筇  
烟蘿雨沒態愈濃長笑南浮太史公會稽禹穴遍踪跡不知天  
河綠水縹渺回層穹我來半臂忍寒坐此身默與雲泉逢雪晴  
佳想無人同夢落化城聞暮鐘青陽郭外喚鸞鶴靈異雜沓來  
相從書堂深處豈有熱客借山靈招我未赴緣匆匆

光孝寺貫休四羅漢

阿師晚奪吳盧席腕底眞容夢中識閭浮無地著神通飛向臺  
端駐瓶錫無窮變幻盡平等法到雄深不織仄雲堂院物空烟  
煤妙墨何年仲翔宅炎荒亦是清涼地要與蠻雲洗昏黑十六

圖今愁遺幾四幘獨完三昧力就中點淡寫經圖殿角竇竊長  
廊寂精誠直貫百千部榆櫨盛歸貝多譯僧羅凝立質已忘千  
歲老猿動精魄伏虎真人兩眉雪樹根跌坐閒雙鳥斑奴呼出  
耳有痕馴擾如羊解迎客淵淳嶽峙無定態一軸渡海一面壁  
浮蕉折葦殊昔聞方褥平鋪信熬擲天吳拱臂若前導半沒腰  
身露雙鬪軒然大波隘寰宇法力所至洪濤壙入定老人祇畫  
背一綫已具圓滿格年深著膝穿團蒲想有遺形入山石山靈  
投牒意猶疎弟子麾去容逾默如斯變相人豈窺乃是真詮貫  
胷臆當年去秦還入蜀萬水千山來得得飛空身是應真圖寫  
出人閒渾難測蛛絲屋漏七百載止有天機無粉墨小長蘆叟  
昔好事得一已足資歎息豈知更有南樵翁搜抉幽遐擅奇癖  
手摹鐵塔千佛古身倚菩提百尋直摩抄絹素開凝塵讚歎圍

繞終日夕訶林葉青榕爾白奔走龍象飛霹靂通靈恐歸兜率  
天呵護好借南華釋吁嗟神物豈易匿朱繇試仿道元蹟他年  
東海觀化身定對神光憶南國

時南澗先生摹  
四羅漢北歸

柘西鐵塢新出字寄李南澗

東塢塗金誰所污西塢蒼然閱終古鐵花鏽澀斑于苔一月精  
藍恣摩撫木魚清曉呼僧粥自掃虛堂闢窗戶蓮趺半蝕金薤  
文好事髯公手親剖試攜老衲事椎搥佛號層層拓縑楷字形  
斜帶玉毫光墨汁飛作菩提雨冥搜豈期意外獲乍有所見同  
朴舞飛檐翼翼開雲雷波磔模糊得文五其上橫書復魚貫側  
身捫讀勞仰俯文同範異到眼明得隴望蜀稱情子官云內給  
事都監羣稱弟子依佛祖此塢造自龔澄樞例得書名遍闔豎  
不知岩壑相輪頂似此題刻復幾許梯枕且絕香烟回金粟莊

嚴半塵土棄同雞肋真可惜嘗似禁衛聊小補後來知復繼幽  
尋更續前聞快新睹我公作記考譌闕拓寄未敢相夸詡他時  
證古風幡堂聊助豪談一揮塵

胡定先過訪論詩兼訊玉洲遺稿

過我論詩挾新律忽憶異時同醉吟文人每自憎少作烈士未  
全灰壯心東風落筆春滿眼夜月寫愁梧十尋冷魄憑君一喚  
醒朱弦未絕靈牀琴

除夕

三十年如夢惺惺不忍尋物華催髣髴人事奪光陰嘆息千秋  
業低徊一寸心兒童竟何喜相守到更深

得李南澗先生書云正月五日度嶺與東坡同日

錄一

海濱來作七年住嶺路歸同五日春一事要應誇玉局不須惆

悵望楓宸

寄馮魚山

日暖帝城花氣繁，藏身人海過高軒。  
諸儒多在石渠閣，一士何時金馬門。  
心有天游差自勝，學除經術未爲尊。  
縉塵不到維摩室，定對松筠憶故園。

畫蘭

春光入戶簾垂地，睡起推窗覺花氣。  
閒階小立悄無人，香霧濛濛著衣袂。  
石欄點筆寫騷愁，沅湘無波江水流。  
楚客殘魂招不得，嫩人極望徙離憂。  
孤高坐惜芳華去，桃李成蹊春日暮。  
曉風長坂汎崇光，薄露泠泠泣幽素。

羅浮蝴蝶歌

羅浮大蝴蝶，云是小鳳凰。  
麻姑遺裙白雲裏，東風一吹成文章。

三更弄日日輪赤分得霞光雜金碧濛濛香霧曉不乾萬紫千  
紅作春色朝過華首臺莫宿大石樓玉女明粧插花立雙雙飛  
來峯頂頭花開花落柔絲卷葉葉枝枝齊作繭折來烏柏尙低  
垂籠去碧紗看初展蓬萊仙人六銖衣緯以金縷塗銀泥五雜  
組成錦繡段一雙鴛上流黃機蘭苕分翠毛芳樹飛碧雞黑如  
鴉翎赤鸚鵡白奪鶴擎黃雛鷗五色之禽偷眼詎敢啄千年仙  
鼠戢翼懸烟扉尋春池館誰家好仙蹤只合歸仙島龍蔥竹塢  
梅花村不應潤汝紅塵道奇采豈爲耳目玩重簾坐惜芳菲老  
小滕空解作新圖金粉漏欄竟誰掃會須唾汝翅放汝凌風歸  
朱明洞門春草肥他時四百三十二峯畔看逐新蛾高下飛

次石鼎種竹見寄元韻

一窠野竹枯復榮詩人手栽貯秋聲

自注庭前竹玉州手植

怕吟落葉斷

腸句物我欣戚同一庭憶當上番看筍成一天涼意來前楹攀  
簾愛放風雨入映坐惟有鐙光青今來冷落餘幾莖每逢令節  
思平生烟橫露壓經幾載祇似當年秋月明羨君吟成冰雪清  
點綴物色供詩情畫手誰知鐵鉤鎖寫真合有篋管亭孤村無  
人百花晚想見解籜紛縱橫應憐病客破窗底蕭蕭天籟誰共  
聽空階閒行瘦于竹夢醒但覺寒蟬鳴

九日

浪說閒居愛重九歸來翻覺怯秋聲愁懷得酒終難遣淚眼看  
花祇慙明桑柘寒烟開遠陌牛羊衰草見新塋芒屨短杖荒山  
道不爲登高取次行

鄉賑詩

窮巷無春情荒年無樂聲去秋憂旱魃發歲聞呼庚浮雲暗大

澤十日雨不晴通陌少人過白屋啼嬌嬰日午烟未動村色春  
蕪青府帖昨下縣發粟關孤惻近郊走相先破曉排公庭婦孺  
色何慘胥吏聲猶獐汙浹晚來歸壓肩不得顏一縣數十鄉吾  
里獨遠城誰能具舟漿霑此斗與升黃髮聚族謀先疇出餘贏  
五日一期會三旬六輸傾來似飢驅陶均比割肉平詎能菜色  
減差視陳紅勝家有儋石儲引分不竄名取舍意尙爾嗟來更  
堪矜去冬募米商已選大戶行至今湖南粟漸通陡河船況聞  
捉私釀玉粒耗亦輕先民社置倉法視常平精未能先事備且  
可蘇凋零得飽幸勿忘願言饁春耕

補書二十韻

兩版門中書我與蝨蟬其巧窺主人懶緣壁宅深縫煤始信手  
翻朽斷粉鱗動物微不任咎閣東但自訟曩吾有此書隱座不



充棟問誰伴燈火語及涕先送連牀惜三條結鄰勝二仲人嗤  
鼠銜蠶自哂雞舞甕癡還許客借學乃爲世用蕭條風雨昏狼  
藉筆墨弄豈知丹鉛滿止益今來痛明窗怕展讀坐任清塵封  
濕愁駁薛侵污經覆墻堆茲晨始料理補綴加磨礱短檠未忍  
拋青氈尙知重矧茲抱遺經可以忘屢空要當勤愛惜且莫希  
博綜脫難一字補亡未三篋誦寸田鋤舊荒隻影和孤諷句就  
不無神面堂夜多夢

和虫

韓公初來詫南食蠨山驚眼吁且驚豈知入饌晚彌富蟲豸上  
與鱗介并沮洳何自孕異種竅眎蚯蚓尤深局水田蕃滋陸田  
少于衆生內爲濕生年年首夏及秋仲嘉禾未熟漿先成潛藏  
有時出有節朔望潮長連鷗汀平疇又值跳猛雨戢戢競上彌

溝塍蜿蜒隴底尺有咫出輒寸斷無全形諦觀斷處又生口拍  
浮溶漾多干萍湧波微帶石髮綠映日又類魚尾頰行官撈取  
置竹具若蟹有餽漁有罾乘流舫舫輕可載入市鰕鮓堆同腥  
茄蒂兼得崑崙紫藤菜小摘豐湖青鳴薑動桂鼓漉汁點茗勸  
客千觚騰遠人對案見未曾強下前箸心還憎豈知田翁利獨  
擅租符歲散同官征我聞蟲族類異名禾葉生螻禾心螟野蚘  
蚱蜢蟹蝨賊俱昇炎火煩神靈茲蟲細豈數者比溲淖未解殘  
香杭泥資蠶餽等海物甘滑又足供調烹檐頭曉出食指動饒  
叔不數侯門鯖焚石之投炮鼓聲毆除水際舊有經似茲豈合  
煩壺涿好佐玉粒添片羹誰與加恩有遺簿著此逸味他時徵

有客贈趙渭川句云招手逢人騎蛺蝶遶林和月夢梅

花渭川繪爲小照屬題

師雄夢斷今幾年村南村北花枝連當時祇有雙翠羽參橫月  
落猶翩翩豈知朱明洞口鳳凰子上有仙人散髮垂至肩銖衣  
不污金粉膩玉牀笑擲丹砂圓世人欲見少仙骨來往祇在冥  
冥天羨君胸有石鏡懸石樓大小從高眠梅花數斗供飽嚼神  
游尚被冰霜牽想當午夜滄海日照散萬疊兜羅綿蝶魂盡戀  
花深處湧現銀海鋪瑤田紛然冷豔動我前不知是花還是仙  
嬌雲香雪兩輝映但覺空中逕度遶遶然畫師不是山中人何  
以見子方外緣得非麻姑變化復作此狡獪飛入圖畫不藉丹  
青傳夢中說夢真忘筌身外有身誰拘攣我思訪道葛稚川與  
君鞭笞鸞鳳飛雲顛了然非夢亦非元一花一蝶皆真詮

大風宿香爐峽

古峽蓄雲雨陰厓夜怒號百靈朝劍佩孤枕狎波濤石勢兼風

落灘聲入夢勞前途慎出險未擬憶蓬蒿

泊觀音殿下

絕壁千尋落層梯一線分霜鐘寒到水石乳濕生雲老鵲盤空  
出危灘入夜聞遠懷王趙作高詠送斜曛

舟中次李載園韻

酒薄禁風力詩成竟日曛客裘輕似葉鄉夢遠如雲山色龍頭  
影溪流虎眼紋川程信遲速幽興最憐君

登九成臺

萬瓦鱗鱗出層臺面面陰我尋文獻像來詠武溪深碧嶂芙蓉  
色青天鸞鳳音晚來問地頗真有翠華臨

新瀧尋周府君廟

我懷桂陽紀功頌遠溯神漢熹平年銘辭果否郭蒼手曲紅長

與故吏鑄歐陽洪趙遜者錄文獻祠又何時遷祠中萬索不可  
得但從婁氏窺字原竭來六瀧問行旅尙爾三老疲挽牽狂牛  
奔車況開闢微禹興嘆心淒然王禽山高在何處武水乍與盧  
水連水如建瓴石寢獸區區排決何由緣精誠感深地軸折始  
信越險人有權偉績垂後宜血食籛鉶想像空灘邊惜哉范史  
缺誰補昕煜字恐從譌傳舊石未磨晚或出郃陽蕩陰眞開先  
不然摹擬待重勒已有傳鄭例在前斷岸無由薦蘋藻驚湍衍  
佛聞神弦

度摺嶺二首

錄一

水驛兼旬雨籃輿兩日裘蹇驢疲北去征鴈斷南翔路人郴山  
遠天開楚澤長勝游吾目慰鼓柁下瀟湘

郴州

楚雲迷楚望，郴水繞郴山。  
義帝無祠廟，女郎猶珮環。  
湖湘人去，城郭鶴重還。  
清淑中州氣，空餘想像間。

衡山道中

古色滿衡陽，舟行暮景長。  
片雲迷望嶽，孤月冷浮湘。  
地迴身如葉，風高鴈作行。  
合江亭畔路，未假半帆張。

湘水

不盡三湘水，來從八桂林。  
遠循衡嶽麓，直下洞庭深。  
天地餘秋色，帆檣入暮陰。  
竹枝與蘭葉，終古動哀吟。

青草湖同李載閼分韻

千里湘流綠，到湖湖頭草色未全蘇。  
黃陵廟口斑斑竹，落日春風啼鷓鴣。

黃陵廟

地隔蒼梧楚水湄  
荒墳西去問叢祠  
冰弦曲裏論哀怨  
斑竹枝頭賸別離  
明月白雲憑弔遠  
中洲北渚下來遲  
春風環珮歸何所  
應逐湘流到九疑

三閭大夫祠五首

萬古風騷祖孤臣  
放逐冤去畱繫宗社哀  
憤訴乾坤湖濶蛟龍怒  
階空蕙草翻汨羅  
嗚咽水舊淚漲新痕

行吟來澤畔狂顧尚  
鄉津祇解思公子何心  
怨黨人九章盡哀郢  
三戶果亡秦異代投書  
客長沙獨愴神

已自傷羣吠誰能任  
獨醒鳩媒太佻巧蘭佩  
失芳馨不盡王孫怨  
難邀帝子靈滄浪徒有  
曲鼓世若爲聽

故君行不返況乃逐臣  
遙漢北江南路離魂何  
處招春風吹薜荔落日  
薦蘭茝呵壁真難問長  
天竟寂寥

白日沅湘上清光其此心蛾眉招妬易魚腹寄愁深遺廟黃陵  
近野湖青草陰精靈自來往楓樹暮江潯

朱仙鎮岳忠武廟

棲霞賸灑英雄淚走馬來過汴京地雲雷閃爍開靈旗彷彿紅  
羅刺成字捷書昔日來西京前軍長驅趨郾城燕雲唾手但傳  
檄兩河父老壺漿迎二十萬人同破竹昨猶跳梁今慟哭可憐  
陵寢委榛蕪待與神州共恢復大業垂成淮北棄何物書生能  
料事永昌陵側詔初來黃龍府外人垂涕歸來萋菲益酸辛禾  
絹士師今少人獄辭大書天日字白簡不悟成沉寃平生報國  
心誰辨後來論古矜權變事讐天寶厭南朝不使中原再清宴  
崇化堂開宅淪沒江州地在人承佃遺祠異代擬王居故壘當  
年經血戰一編零落披金陀手除蒼檜還悲歌精靈來往湯陰



近風雨應聞夜渡河

黃仲則招同馮魚山洪稚存安桂甫余少雲集憫忠寺

寓齋餞春得餞字

仲則前有  
惜花篇

梵宮三月花如霰未到濃香先拂面  
臨風欲落重含情屢過殷勤惜餘片  
詩人一春被花惱花下掩關如蟄燕  
門前幾輩探春客車聲殷牀塵撲硯  
爲花謝客良韻事以客罪花乃奇譴  
卽看朱白各清妍詎有穠華自矜銜  
一錢入市看西子苦被睢盱花亦倦  
朝來小鳥忽催歸欲去流光不容羨  
花開祇解尋夙約花落誰知賸歡讌  
冠蓋散餘吾邨來松篁密處深叢叢  
見將殘恰與半開似遲日微明晚風  
善繁英宛轉入酒樽三嗅餘香不能  
嚙一栳酹花與花約幾度迎春復春  
饒化工榮落自有時來本無心去何  
戀人生聚散亦難定雪泥鴻爪真郵傳  
閒愁已盡若爲

生道眼久空無復眩諸君歡爲花作主一室寂如僧退院不辭  
蠟屐更招尋折取將離是春殿

題洪節母機聲燈影圖

詩人洪  
龍存母

雲溪溪水光泠泠繞樓樹密蒼烟平夜長野曠無人行一點吐  
燄燈如螢東鄰西鄰厭書聲默誦母作金石鳴兒讀未已織不  
停統如街鼓聞寒更此圖未展涕欲零一室人影交玲珉幾絢  
絲照一短檠中有血淚紛縱橫當時習苦茶堇并自今視之樂  
難勝杼柚旁邊授遺經此景欲再知誰令畫手何自通精誠使  
君愛慕如孩嬰喚回人海夢初醒歸撫松楸掩柴荆身上之衣  
母手成至今未遺繒塵生卷圖還君踞且擎苦節誰信不可貞  
欲慰泉壤最令名如機不斷燈常明

趙子固落水定武蘭亭從翁覃溪先生詩境軒獲觀賦

此

昭陵繭紙已物化定武片石經流離千年墨本神鬼守存者重  
埒鐘鼎葵真形岱嶽壓培塿氣母所結無纖歆有如韓幹畫天  
馬貌取神俊遺毛皮疊紙椎楊世未考顧以瘦露輕圓肥紛紛  
苗裔襲名字官庫祖石誰見之昨觀陳氏直齋本神采已過柯

九思

直齋所藏定武本今在編修陳伯恭家

墨光淵然稍沉著肌理潤極無蔽虧

誰知神物一朝合延津劍躍雄與雌鄱陽所藏王孫得

此本爲姜白石

舊

半萬券買忘朝飢天吳陽侯妬欲奪蛟龍拏攫形躩踞鴻毛

性命不自惜入險出險猶護持至今弁山賸濤響錦暉尙有狂  
飈吹邇來流轉又數手退谷之後高王私摩杪置紙宛如昔鋒  
稜隱露沙畫雖鼠須仍仿已退筆英光斂盡濃生姿始信純綿  
裏勁鐵漫論玉兔兼金龜五字完如五星出百十七刻無光輝

翰墨緣在重題跋前有姜趙今吾師吾師齋頭富金菴銘心絕  
品手自披誰歟缸面酒留客輕假至寶來重帷復憐小子解同  
嗜招坐花下從旁窺窗明几淨始一展蕭廬名印考据資吾師  
朝來入太學舍萊廊廡搜殘碑石本嵌壁揭卽得謂國子監恐  
等自鄆初無譏岐陽獵碣歸然在或可伴此同裴池硬黃填廡  
夙未習師儻見許來追隨南還萬里歷輕棹夜虹貫月滄江滄  
將出都門寄石鼎

寸珠尺玉不脛走樵夫聲名滿人口或言襍被來金臺一夕歸  
鞭又南斗或言宿昔夢見之山肩雙屨衣穿肘怪君杜門居瘴  
鄉傳來水墨皆擅場井西道人得筆法一樹一石無披猖墨痕  
頗近大滌子雲霾雨蝕收退荒得非江邨來往飽烟景亦如荒  
山亂石窮蒼茫臥游四壁古亦有字內名山待君久黃河萬里

寫胸懷五嶽真形倩誰剖卽今東閣奇士多邀游輦轂肩相摩  
結交僑札盛意氣譚詩沈范相經過匠斤成風待一斲連城價  
重須切磋星芒虹采不可以久閉期君不來愁奈何我今射策  
慚決科寒驢席帽行蹉跎君應招隱我勸駕矛盾或被旁人訶  
烏還雲出事一致泉清泉濁理則那歸來茹屋共商略祇恐拔  
劍斫地煩悲歌

天津

白日不見影濁浪如雲屯北來三百里嚙斷長隄根衛河南注  
之浩浩方東奔七十有二沽滙流此其門河海一以合光景相  
摩吞危樓俯渺漭極目何渾渾腥風撲面來怪雨時飛翻空濶  
魚龍入破碎星斗繁繞城十萬戶一一潮汐痕乍洗京洛塵載  
晞搏桑噉豈惟物類錯壯觀茲焉存自從海運廢漕輓無驚魂

沿隄但賈船犀象來源源曰余家炎州海氣無朝昏巨波隘寰  
宇颶母中怒掀蠓山與鶯帆瑣屑不復論溟漲等南北呼吸通  
天開便欲乘巨鼇歸看擊靈鯢詎無六月息羽翼誰爲騫望若  
還入舟嚴關夜濤喧

大水歎濟寧道中作

漕河南下如駛颶湖影盡界河東西昭陽南陽兩明鏡河身一  
綫隨長隄泉流沆沔沂泗合地勢滕嶧豐沛低儲水作置隄作  
埭利兼蓄洩時不稽自從黃流日南徙已見湖岸成連畦菱熟  
蒲荒雨顛倒蟬疎柳密烟淒迷生理況聞足魚稻厥土漸可書  
塗泥龍驤萬斛日牽輓鴈戶幾邑同耕犁徒言陵谷有遷改豈  
知衽席生虹蜺秋來正報瓠子決牖勢盡受湖所擠濤頭一過  
萬室沒不沒尺許枯楊稊中流魚鱉氣豪橫天末雁鶩聲酸嘶

鳬雲嶧雨遠呼吸蜀山南旺相挈提區區城堞若搖撼便恐并  
入青玻璃我行兩月墮渺漭來泊一葉如鳬驚頽垣折葦詎可  
纒浮萍斷梗將安棲書生性命自窮薄尙有餘痛關蒸黎頗聞  
宣房尙未塞時青龍岡漫告凶不獨魯與齊欲繪流亡問真宰  
澤國何術回顛隤百神受職河有秩忍令充耳斯民啼居人已  
苦逼罔象行客詎免吞鯨鮪布帆安穩未敢祝蓬轉一任霜風  
淒

常州道中寄懷黃仲則時西行未回

我行萬里寡交游自喜無雙識江夏僧廊寄榻半喧寂人海藏  
身少憑藉倚門元叔囊無錢耽病文園賦增價初回襪被自山  
左乍擘塵袪仍日下酒徒幾輩歇還散花事一春開又謝我時  
垂橐盼南雲君乃脂車指西華秦關燕塞路迢遞嶽色河聲氣

雄跨地當形勢慰羈愁感到興亡動悲咤馬磨平生自將具牛  
心到日誰行炙氣帶幽并對客吟夢落菰蘆見親舍君家第二  
泉邊路清秋一棹沿洄乍石田茆屋不歸來席帽黃塵何日卸  
依劉遠道逢迎有說項幾人牙齒借薄餘書劍終伶俚少得聲  
名雜嘲罵男兒出門恥干謁便合將母勤畊稼著書應未厭窮  
愁愛日方知足閒暇我如秋鴻鍛毛羽自向寥天怯彈射溪山  
好處戀朋儔況此江城棹舟夜知君坐少陽羨田悵我徒回剡  
溪駕

吳門得李正夫書

幾紙鄉書弭櫂前招尋異地杳無緣吟成風雨還重九夢落江  
湖又十年燕雁來時朝伏枕吳歛聽罷夜回船淒迷虎阜山頭  
月才話前塵意惘然



山塘寓樓聞鴈

野曠天清欲下遲夢回酒醒忽相期幾家樓閣殘燈影五夜風  
霜兩鬢絲毛羽自憐行斷後稻梁何意日斜時天涯不少閒洲  
渚憔悴南來爾許悲

舟發聞吳歌

殘夢尙纏金昌亭無多別酒風吹醒殷勤送客五湖月胥江直  
到吳江明棹歌中流時近遠篷底吳娘夜歸晚尋常喚取當筵  
聽纔到別離帶幽怨風前忽斷尋何處柳外空濛數聲櫓菰蒲  
此獵布帆斜驚起沙禽隔烟語

題宋高宗賜韓蘄王新淦田手詔石刻

清涼居士晚杜門湖上醉歸烟雨昏紅羊換劫此何世殘山濛  
水無田園裏創百戰心仍壯垂老菟裘淦江上深宮自喚太平

翁故主猶思中興將克敵無擾真奇功背嵬軍散何匆匆官田  
未是酬勲物新莊特許名旌忠園花手種何人見優詔初來曆  
思殿破體書看玉潤遺略似汾陽舊時傳英雄未死尙承恩小  
朝廷在多驚魂苞桑至計但和議不及臣家憂子孫遺刻摩挲  
峽江水彷彿精靈聚中泚江州咫尺動人悲水磨廊房岳家市  
貫休咒鉢羅漢歌

圖本光孝寺中物與寫經伏虎面壁渡海同在十六  
軸內者寺僧不能守流轉俗閒壬寅正月予購得之  
讚歎賦此

香雲一縷垂盤陀坐具敷設平不煩火宅清涼道場現天然真  
相開禪那手中鈴杵石上鉢口出神咒聲嘍囉波旬億眾在何  
許想見降伏心無它四大海水入毛孔何況一鉢容江河凡夫

視此寸潯比豈知瀕洞陽侯波悅怱神龍內蟠屈鱗鬣未現先  
翻渦老熊千歲具佛性擁錫立似阿脩羅鬚髻髮束合兩掌宛  
爾秘怪煩撓訶當空寶月正圓滿遍照大地窮逶迤悠悠花香  
無隱爾金粟吹落秋雲多當時寫出第幾軸渡海面壁殊白科  
訶林舊物龍象惜流轉俗手誰摩挲神光何自入齋壁應喜丈  
室陪維摩斷縑零落色黯淡神理未遽同消磨亦如舌根終不  
壞入眼詎止雲烟過便思永結香火社俗緣未盡真蹉跎空齋  
得句試呈佛要憑法力驚詩魔

送李文穎游大梁

昔聞合浦葉飛入洛陽城君去沿江漢何時達汴京天涯師友  
誼壯歲別離情到日吹臺望浮雲但北征

古鐵簡歌

鐵簡長三尺重七鎰製作甚精傳是狄武襄征儂智  
高時部將張玉故物客有從思田購得者今歸溫蘭

田舍人

古鐵簡色勝銀提來腥風寒襲人傳是皇祐物後爲粵西土司  
之所珍楚弓人失亦人得流轉乃來南海濱主人癖好古量以  
漢尺權以斤若劍有鐔鉞有秘鏤文細作虬龍鱗云昔狄武襄  
仗節懸孤軍軍中驍雄誰第一儂蠻咋舌張寶臣帳前昨日斬  
鈐轄一夕旗鼓趨崑崙指麾蕃落數百騎此簡獨出疑有神模  
糊碧血洗不得啾啾鬼哭愁歸仁氛祲淨掃魍魎伏畱此可鎮  
邑與賓至今撫視芒角出猶帶慘淡京觀魂亦有日本刀懸著  
梁柱摩挲頻故侯寶劍直百緡脫鞘躍出雌雄分豈如一簡威  
稜遠映漢銅柱能令五管永永無邊塵

同日觀日本  
刀真古劍

李藝園

芳清

在河南康觀察署中籌辦河工兩載初歸

羊城喜賦此詩

美玉不隱璞志士慙邱樊壯游萬人海鼓篋趨橋門鐘鏞與瑟  
笙涵養皆粹溫似聞別舍中諸生閑何蕃一朝單車出鵬鶚凌  
風騫平生國士知感激在梁園結束渡大河水氣何奔渾一從  
北岸決萬眾爲蛟龍漂流曹宋墟蕩泊豐沛原漕渠洸汶來坐  
受洪濤吞引河度地急邱引河自蘭陽十二堡至商萬落連千村  
勢如車北馳挽之使南轅畚鍤不難具貴在無愁怨薪芻內  
府出度支日以繁要令蠲蠹除閭閻盡知恩堂堂太原公中州  
寄屏藩君來下馬揖意氣排鯨鯢疏濬日有程可以資討論月  
黑大隄上風雷鬱飛翻晦冥壓圓穹震蕩裂厚坤往來輕險絕  
對案不及殮誰能借著壽不惜筋力煩功多匪簿領退默初無

言兩年緩歸期世識儒術尊歸來拂衣袂尚帶埃塏痕九枝蟠  
胸臆指畫委與源我昔八牕行濁浪連朝昏一爲瓠子歌至今  
有驚魂喜聞濟時略頓釋心煩冤君才在用急葉茂山深根他  
時鱸堂開官冷吾道存襟期同野客醉倒歌羲軒

馮魚山以黃仲則凶問見訃感賦

一夜秋聲冷薜蘿臨觴不御悵如何書來遠道悲歡雜交到中  
年涕淚多身後聲名原寂寞人前意氣惜蹉跎鬢絲禪榻論文  
地忍憶春殘載酒過

過常州輓黃仲則二首

吟魂招傍大江行嗚咽濤聲雜雨聲千里素車期范式

謂雅存

年詩品付鐘嶸屯憐骨相天難問豪擅才華世亦驚一過殯宮  
秋寂寞不須宿草淚縱橫

羅薛江城冷舊廬風雲秦隴返靈車青山好處遲埋骨白髮悲  
來誤倚閭身後方干誰慰藉年時李賀最聲譽生材難得摧殘  
易劍氣宵分望斗墟

題王元章墨梅

自題云瑪瑙坡前梅爛開巢居閣下好  
春回四更月落霜林靜湖上琴聲載鶴

來印云會  
稽佳山水

清尼長者蹟絕倫筆妙獨許山農親移家晚傍鑑湖水艤櫂尚  
踏孤山雪咸平處士魄已冷巢居閣下花含顰却將洗硯池頭  
墨淡與冰雪摹精神一枝橫斜玉作塵兩枝並擢蒼鱗皴幽香  
冷豔看不足疑有落月涼紛紛儵然載鶴來湖濱無復騎牛驚  
市人寫花不獨貌花影自貌避俗花前身有時調脂作沒骨坐  
令權貴趨風頻世人但賞顏色好未若此圖尤逼真印材想像  
花乳石篆縮紋映花枝新佳山佳水足神往攜此試探羅浮春

蜀岡看梅

去年殘臘庾嶺頭自折南枝別鄉國今年獻歲湖山上處士魂  
荒弔泉石客行未已花正繁春滿江南又江北廣陵殘雪眾峯  
曉蜀江初日長林白光風半逐流水生幽情未受雕闌隔漫言  
千樹是香海看取橫枝盡標格虹橋歌舫闌若雲獨抱孤高待  
閒客過淮知復無幾見旅況物華尤愛惜不辭滿插帽簷回忍  
待重來點苔碧

偕戴聲甫瑞夫汎蜀山湖作

客懷與汝日夜南濡滯未已疇能堪外河一縷內湖隔反以淹  
泊成幽探僻處游踪到應罕物外野逸情尤耽湖田每每喚舫  
舫落日欲盡蒼烟含蟹簾漁絕路初入荷花菱葉紛難芟白鵝  
遠泛類前導去去天水同蔚藍寒波渺漭四十里一葉飄然疑



浮鷗遙岑寸碧望不極玦環擲下浮輕嵐中流一峯復何有就  
視不見空茅菴停橈一上步犖确始覺平鏡留湖嵌回頭缺月  
波上涵波影破碎流穆穆清光豈爲此數子不待對影人成三  
北來舟行苦埃壒乍去已若馬脫銜况逢雲水佳興發江湖遠  
意吾舊諳但令塵垢洗胸次正似霽月還澄潭與君沿流濯素  
足萬籟已寂歌嘯酣寒魚喁噉亦時出騰蹕若訝幽人談眼前  
清景豈得戀複牖過盡還抽帆

自題山水障子

節候清明寒食前遠山如夢樹如烟旁人錯認清秋景只少斜  
陽與暮蟬

孤舟

春色大江浮孤舟生暮愁鄉關有明月只近最高樓

瀧船

沙隄買瀧船未入愁欲絕兩頭纖千梭什伍排若櫛瓜皮製頗  
近鴨背形又別篙如強弓彎蹶張不摧折纜行卽搖撼已艤猶  
兀陲容膝有孤篷打頭礙黃篋誰云客裝薄偏塞半書帙持杯  
唇未濡溺管肘疑掣枕簟生微瀾始覺船底裂預愁九瀧水飛  
瀑噴怒雪轟轟龍鼉翻石角乍明滅一葦空云杭重險詎可脫  
長年顧我語物理君未徹舌以柔而全齒以剛而缺君看舟萬  
斛牽挽有蹉跌上竹愁鮎魚緣雲笑跛鼃吾船柔繞指不畏石  
積鏹聞言強自慰已至那得說淦淦山頭雲豔豔波底月歌嘯  
辭隣舟前灘去如瞥

巴陵道中

倚棹長吟下洞庭三江雲樹遠冥冥雪消春水流殘白風暝湖

山入舊青野外寂寥張樂地樓頭呼吸列仙靈夜寒莫鼓湘娥瑟恐有魚龍跋浪聽

舟中留別左杏莊

黃埃眯目不辨人道旁解鞍初識君晝同炎燠夜涼雨卧有草榻餐有饑倦翮投林戀儔侶勞人和歌多慨呻半月行如馬銜勒福舟入似魚縱鱗濟汶北來大河濱風景漸近江南春君行抵家不浹旬我行未已當乖分舊識金華牧羊客同里君是平生親傷心殯宮網蟲遍有母白頭兒赤貧束芻先時致薄少得附行篋知何因酒鑪重過不成醉隣笛未起先沾巾感離懷舊共根觸跡雖萍合交非新人生立談見風義把臂看君情甚真東吳迢迢望南雲寄聲遠道何由頻西行倘有洪玉父歸日倘

遺冰雪文

洪稚存許寄仲則新刻詩

題謝芸隱聽瀑圖

鼓吹不用官蝦蟆陶寫不用箏琵琶耳根清淨果何物絕愛  
飛流萬仞濺珠跳玉來谿谿四山繆繆草木靜疾雷自轉空中  
車長虹下翻水府黑急雨亂洒松風斜自非物外枕流客誰與  
獨往窮幽遐道人心如止水靜未解塵囂汚清聽銀河落處垂  
天紳寫入胸懷冰雪淨道人堂中張玉琴抱琴不彈妙琴心閒  
來讀畫亦成癖畫意每從靜中得是琴是畫誰能覩幽趣繪出  
霜毫尖若非西樵漱玉好巖洞定是蓬萊左股大小之水簾風  
飄著樹煩可嫌何況萬壑笙鐘兼以茲可悟喧寂理巧爲俗耳  
施鍼砭嗒然隱几離塵壘地籟何知非天籟他時返聽寂不聞  
一任餘音散空外

靜默寺寓齋自題畫梅用東坡松風亭下梅花盛開韻

蓬萊左股花爲村夢騎蝴蝶尋花魂白雲縷縷散空谷花光淨  
洗浮嵐昏覺來尙記橫枝影身在殘雪祇樹園春風萬里人毫  
楮暖香一室回靜溫唐花出智生意淺愛此清氣如初暎軟紅  
十丈飛不到但有缺月窺柴門禪燈照壁人影瘦疣琴有韻花  
無言鄉心耿耿坐悵觸未能撥置聊開尊

趙松雪華氏中藏經墨蹟卷

藝文略考鄭夾漈醫方類別五藏門華佗遠孫所撰述但著姓  
氏名不存流傳要是宋前作松雪齋寫淡墨痕論方別作卷上  
下兩卷萬有千餘言一十九論缺其十方六十道兼寒溫云有  
中卷四十論缺簡未見心煩寃豈其俗手妄割裂巧偷不異遭  
秦燔陸本庫本亦同異八方附未猶弗諉五色傍通恍繪出欲  
從思邈問病源

孫思邈五藏傍通卷圖一卷通志次此經之下

昔賢學不遺藝術祕

笈詎付鈔胥捫揮毫況未淹晷刻松雪日寫萬字見輟耕錄若駿馬逸驚鴻  
騫兩宗廟諱避惟謹尙憶身是前朝孫方今遺書富薈萃難經  
本草搜羅繁此經僅存賴此蹟較雷桐錄誰輕軒卽論書體亦  
超羅綺習壽諸樂石庶以珍瑤琨

倪元鎮詩彙殘本墨蹟

清詩存者二百餘倪高士作手所書當其改罷律愈細初彙旁  
注仍存諸所注或存或塗乙商略未免心煩紆火浣壇獨缺未  
補欲屬而和猶有須中間已酉改定字歲月自記記不虛我觀  
早春對雨作又若春日雲林居集中改本每並載以校原本文  
則殊始知許法用心苦不獨畫理探精腴杜楊花句淡墨易蘇  
蜜酒歌前後區萬篇未妄一字下古來作者皆同途此本舊落  
誰氏手裴背紙尙官冊俱題籤字認梅壑蹟小玲瓏館之所儲

宋君兩度廣陵得見贈合若操左符諦觀楷法盡晉法停雲館  
僅存皮膚翠墨數行亦賸馥何況萬有千百驪龍珠藏清閼橐  
並藏字絕勝句曲張雨錢唐俞

整理落水書畫二首

錄一

半脫裝池手重擎試收餘燼眼猶明英光深恃神能護豪語難  
憑命可輕於物多藏仍是累與人同患得無情潮痕狼藉相料  
理寒具依然未許并